

四庫全書

史部

欽定四庫全書

史部

資治通鑑卷二百五十八

詳校官修撰臣錢 榮

洗馬臣王坦修覆勘

總校官知縣臣楊懋珩

校對官中書臣盛敦崇

謄錄監生臣姜今熙

欽定四庫全書

資治通鑑卷二百五十八 宋 司馬光 撰

胡三省 音註

唐紀七十四

起居維作盡重
光太淵獻凡三年

昭宗聖穆景文孝皇帝之上

諱傑懿宗第七子
及即位改名敏人

改名

龍紀元年春正月癸巳朔赦天下改元

考異曰唐年
補錄曰正月癸

己改文德二年為龍紀元年百寮上帝徽號曰聖文睿
德光武弘孝皇帝新舊紀實錄明年正月乃上尊號補

錄誤也舊紀又云以劔南西川節度兩川招撫制置使
韋昭度為東都留守按照昭度大順二年乃為留守舊紀
誤也今皆從實錄
以翰林學士承旨兵部侍郎劉崇望同平

章事 汴將龐師古拔宿遷軍於呂梁

九域志徐州彭城縣有呂梁洪

鎮 時溥逆戰大敗還保彭城 壬子蔡將郭璠殺申叢

送秦宗權於汴

璠爭袁翻 考異曰實錄申叢裴涉欲復立宗權為帥汴將李璠知之斬叢涉

以宗權送汴州薛居正五代史初申叢縛宗權折足而囚之雖納款於太祖欲自獻於長安以邀旄鉞及姦謀不就乃欲復奉宗權以接取其柄為其將郭璠所殺繫宗權送於太祖即以璠為留後太祖遣都統判官韋震奏事且疏時溥之罪願委討伐仍請降滄兗二帥之命按全忠若自求兼領滄兗二鎮則明年朝廷命兼領滑

州全忠猶辭不受今豈敢遽求滄兗邪若為滄兗二帥求之則兗帥朱瑾乃其仇讐也當時不知全忠欲以何人為滄帥諸書皆無其名薛史實錄皆云申叢欲復立宗權按叢折宗權足而囚之豈有復奉為帥之理蓋郭璠欲奪其功誣之云爾新舊紀五代紀傳皆云郭璠殺申叢而實錄云李璠誤也李璠乃遣送宗權者

告

朱全忠云叢謀復立宗權全忠以璠為淮西留後

朱全忠又

并淮西以連襄鄧其勢愈盛矣

戊申王建大破山行章於新繁殺獲

近萬人行章僅以身免楊晟懼徙屯三交行章屯濠陽

與建相持

儀鳳二年分九隴雒什邡三縣置濠陽縣屬彭州九域志在州東三十一里宋白曰縣在

濠江之北故曰濠陽

二月朱全忠送秦宗權至京師斬於獨柳

考異曰舊紀汴州行軍司馬李璠監送秦宗權并妻趙氏以獻斬於獨柳實錄三月全忠獻宗權斬於獨柳新紀二月戊辰朱全忠俘宗權以獻己丑宗權伏誅按宗權正月離汴不應三月始至長安戊辰獻俘不應至己丑始伏誅故但云二月京兆尹孫揆監刑監古銜翻宗權於檻車中引

首謂揆曰尚書察宗權豈反者邪但輸忠不效耳觀者

皆笑揆逝之族孫也

孫逝仕至刑部侍郎揆五世從孫也

三月加朱全

忠兼中書令進爵東平郡王

考異曰舊紀在四月封東平郡王薛居正五代史

在三月亦云封東平今從實錄止加中書令據考異則進爵東平郡王六字合汰然按舊書帝紀光啟元年封全忠沛郡王此時雖未進爵東平固已封王矣全忠既克蔡州軍勢益盛加

奉國節度使趙德諱中書令

傳宗中和二年以蔡州為奉國軍命秦宗權為節度

使文德元年以襄州為忠義軍命趙德諱為節度使宗權既亡未嘗以奉國節授人趙德諱亦未嘗兼奉國節

當改奉國為忠義

加蔡州節度使趙肇同平章事充忠武節度

使以陳州為理所

忠武本治許州趙肇陳人也又守陳有功因徙治所於陳肇昌牛翻會

肇有疾悉以軍府事授其弟昶表乞骸骨詔以昶代為

忠武節度使未幾肇薨

幾居豈翻代史趙肇傳曰

文德元年蔡州

平朝廷議勲肇檢校司徒充泰寧軍節度使又改授浙西節度使不離宛丘兼領二鎮龍紀元年三月又以平巢蔡功就加平章事充忠武軍節度使仍以陳州為理所肇一日念弟昶共立軍功乃下令盡以軍州事付於

昶遂上表乞骸後數月寢疾卒昶傳曰犇遙領泰寧軍節度使以昶為本州刺史俄而犇有疾遂以軍州盡付於昶詔授兵馬留後旋遷忠武軍節度使亦以陳州為理所時宗權未滅陳蔡封疆相接昶每選精銳深入蔡境蔡賊雖衆終不能抗以至宗權敗焉上云蔡州平以犇為忠武節度使下云昶為節度使時宗權未滅自相違今從

犇傳

丙申錢鏐拔蘇州

去年冬錢鏐攻蘇州事見上卷

徐約亡入

海而死

光啟三年徐約據蘇州今走死

錢鏐以海昌都將沈粲權知蘇

州夏四月賜陝虢軍號保義

陝失冉翻

五月甲辰潤州

制置使阮結卒錢鏐以靜江都將成及代之李克用

大發兵遣李罕之李存孝攻孟方立六月拔磁洛二州

方立遣大將馬溉袁奉韜將兵數萬拒之戰於琉璃陂

方立兵大敗二將皆為所擒克用乘勝進攻邢州方立

性猜忌諸將多怨至是皆不為方立用方立慙懼飲藥

死

中和二年孟方立據邢州

弟攝洺州刺史遷素得士心眾奉之為

留後

考異曰實錄克用以弟克修守潞遣澤州刺史安金俊討方立方立因結諸鎮救援其將奚忠信

攻遼州克用復遣李罕之等急攻方立將馬溉出戰為罕之所擒溉謂曰欲圖邢州當先取磁州及并師圍磁州方立與奚忠信帥兵大戰軍敗陷磁州而方立單騎還邢州忠信死焉方立愧之乃自圖死三軍立其弟遷求援汴州朱全忠遣王虔裕赴之鎮州王鎔遣克用書而退唐年補錄方立有謀將石元佐為金俊所獲金俊

問之元佐請攻磁州破奚忠信金俊乃殺之方立果與
忠信引兵入磁金俊與之戰大敗忠信死方立單騎入
邢州愧見父老遂自裁薛居正五代史方立傳六月李
存孝下洺磁兩郡方立遣馬溉袁奉韜盡率其眾逆戰
於琉璃陂存孝擊之盡殪生獲馬溉奉韜初方立性苛
急恩不逮下攻圍累旬夜自巡城慰諭守陴者皆偃方
立知其不可乃飲酖而卒其從弟洺州刺史遷素得士
心眾乃推為留後求援於汴時梁祖方攻時溥援兵不
出按李罕之攻下磁州進攻洺州乃擒馬溉實錄云溉
為罕之謀取磁州蓋誤以石元佐為溉也又奚忠信去
年已為李克脩所擒乃云與方立率兵大戰亦誤也舊
紀六月邢洺節度使孟方立卒三軍推其弟洺州刺史
遷為留後李克用出軍攻之新紀六月李克用寇邢州
昭義軍節度使孟方立卒其弟遷自稱留後按唐年補
錄載王鎔奏得邢洺大將等狀以孟方立奄辭昭代二
軍百姓同以親弟攝洺州刺史遷權知兵馬留後事及

新舊紀實錄薛史方立傳皆云立其弟遷惟太祖紀求
年錄及薛史武皇紀云立其姪遷恐誤今從諸書

援於朱全忠全忠假道於魏博羅弘信不許全忠乃遣

大將王虔裕將精甲數百間道入邢州共守

開古覓翻
為孟遷執

王虔裕降
河東張本

楊行密圍宣州城中食盡人相啗指揮使

周進思據城逐趙鐸鐸將奔廣陵田頔追擒之未幾城

中執進思以降

幾居豈翻
降戶江翻

行密入宣州諸將爭取金帛

徐溫獨據米困為粥以食餓者溫胸山人也

困去倫翻
倉圓曰困

食祥吏翻徐溫之
速略已見於此矣

鐸將宿松周本勇冠軍中行密獲而

釋之以為裨將

宿松漢皖縣地梁置高塘郡隋廢郡置宿松縣唐屬舒州九域志在州西南一百四十里宋白曰宿松縣漢元始中為松滋縣屬廬江郡晉武帝以荊州有松滋縣遂改為宿松冠古玩翻

鏗既敗左右皆散惟李德誠從鏗不去行密以宗女妻

之

妻七細翻李德誠自此遂委質於楊氏海陵讓皇之世此心復能如從鏗之時乎

德誠西華

人也行密表言於朝詔以行密為宣歙觀察使

朝直遙翻歙書

涉翻

朱全忠與趙鏗有舊遣使求之行密謀於袁襲襲曰

不若斬首以遺之

遺惟季翻

行密從之未幾襲卒行密哭之

曰天不欲成吾大功邪何為折吾股肱也

折而設翻

吾好寬

而襲每勸我以殺

好呼到翻

此其所以不壽與

與讀曰歟

孫儒遣

兵攻廬州蔡傳以州降之

降戶江翻

朱珍拔蕭縣據之與時

溥相拒朱全忠欲自往臨之珍命諸軍皆葺馬廐李唐

賓部將嚴郊獨情慢軍吏責之唐賓怒見珍訴之珍亦

怒以唐賓為無禮拔劔斬之

珍唐賓交惡久矣乘怒殺之不復顧慮

遣騎

白金忠云唐賓謀叛淮南左司馬敬翔恐全忠乘怒倉

猝處置違宜

處昌呂翻

故留使者逮夜然後從容白之

從千容翻

朱全忠兼領淮南節度以敬翔為左司馬逮夜而後言則全忠雖怒而未能發其暴全忠果大驚

翔因為畫策

為于偽翻下為之同

詐收唐賓妻子繫獄遣騎往慰

撫全忠從之軍中始安秋七月全忠如蕭縣未至珍出

迎命武士執之責以專殺而誅之

敬翔為全忠謀取朱珍猶用前計

諸

將霍存等數十人叩頭為之請全忠怒以牀擲之乃退

使全忠不殺朱珍珍其肯為全忠用乎霍存等為之請弗思爾矣為于偽翻

丁未至蕭縣以

龐師古代珍為都指揮使八月丙子全忠進攻時溥壁

會大雨引兵還

冬十月平盧節度使王敬武薨子師

範年十六軍中推為留後棣州刺史張蟾不從詔以太

子少師崔安潛兼侍中充平盧節度使蟾迎安潛至州

與之共討師範

為王師範殺張蟾張本

以給事中杜孺休為蘇

州刺史錢鏐不悅以知州事沈衆為制置指揮使

沈衆制其

兵權杜孺休

直寄坐耳

楊行密遣馬步都虞侯田頔等攻常州

時錢鏐將杜

稜守常州

十一月上改名曄上將祀圓丘故事

中尉樞密皆襖衫侍從僖宗之世已具襖笏

襖睽挂翻衣裾分也

襖音闌即今之袍也下施橫幅因謂之襖新志曰唐初士人以棠苧襖衫為上服貴女功之始也一命以黃再命以黑三命以纁四命以綠五命以紫中書令馬周上議禮無服衫之文三代之制有深衣請加襖袖襖為

士人上服開髻者為缺髻衫庶人服之長孫無忌又議服袍者下加襴緋紫皆視其品從才用翻至是

又令有司制法服法服謂冕服劔佩也孔緯及諫官禮官皆以為

不可上出手札諭之曰卿等所論至當當丁浪翻事有從權

勿以小瑕遂妨大禮於是宦官始服劔佩侍祠考異曰按田

令攷楊復恭雖威權震主官不過金吾衛上將軍則其餘宦官必卑矣但諸書不見當時宦官所欲衣者何品

秩之法服也己酉祀圓丘赦天下上在藩邸素疾宦官及即

位楊復恭恃援立功援立見上卷上年所為多不法上意不平

政事多謀于宰相孔緯張濬勸上舉大中故事抑宦者

權復恭常乘肩輿至太極殿

太極殿西內前殿也

他日上與宰相

言及四方反者孔緯曰陛下左右有將反者況四方乎

上矍然問之緯指復恭曰復恭陛下家奴乃肩輿造前

殿

矍居縛翻造七到翻

多養壯士為假子使典禁兵或為方鎮非

反而何

揚復恭以假子守立為天威軍使守信為玉山軍使守貞為龍劔節度守忠為武定節度守厚

為綿州刺史其餘假子為州刺史者甚衆號外宅郎君又養子六百人監諸道軍

復恭曰子壯

士欲以收士心衛國家豈反邪上曰卿欲衛國家何不

使姓李而姓楊乎復恭無以對復恭假子天威軍使楊

守立本姓胡名弘立勇冠六軍

冠古玩翻

人皆畏之上欲討

復恭恐守立作亂謂復恭朕欲得卿胡子在左右復恭

見守立於上

見賢遍翻

上賜姓名李順節使掌六軍管鑰

北軍

六軍皆分屯苑中屯營各有門晨夕啟閉

不期年擢至天武都頭領鎮海節

度使俄加同平章事

天武亦神策五十四都之一期讀曰暮

及謝日臺吏

申請班見百僚孔緯判不集

判臺申不使集百官

順節至中書色

不悅他日語微及之緯曰宰相師長百僚

長知兩翻

故有班

見相公職為都頭而於政事堂班見百僚於意安乎順

節不敢復言

復扶又翻

朱全忠求領鹽鐵孔緯獨執以為不

可謂進奏吏曰朱公須此職非興兵不可全忠乃止

史言

孔緯相唐欲振紀綱惜制於時不得行其志耳

田頎攻常州為地道入城中

宵旌旗兵甲出於制置使杜稜之寢室遂虜之以兵三

萬戍常州 朱全忠遣龐師古將兵自潁上趨淮南擊

孫儒

宋僑置樓煩縣於汝陰郡界後魏以縣為下蔡郡治所後齊廢郡隋改為潁上縣唐屬潁州九域志

在州東一百一十七里趨七喻翻

十二月甲子王建敗山行章及西

川騎將宋行能於廣都

敗補蓮翻

行能奔還成都行章退守

眉州壬申行章請降於建 戊寅孫儒自廣陵引兵度

江壬午逐田頔取常州以劉建鋒守之儒還廣陵建鋒

又逐成及取潤州

成及為錢鏐守潤州

前山東南道節度使劉

巨容之在襄陽也有申屠生教之燒藥為黃金田令孜

之弟過襄陽巨容出金示之及寓居成都

中和四年巨容自襄陽奔

成都令孜求其方不與恨之是歲令孜殺巨容滅其族

大順元年春正月戊子朔羣臣上尊號曰聖文睿德光

武弘孝皇帝改元

上時掌翻

李克用急攻邢州孟遷食竭

力盡執王虔裕及汴兵以降

僖宗中和二年孟方立據邢磁洺三州至是而亡

考異曰唐末見聞錄龍紀元年大軍守破邢州城孟遷投來拜李存孝邢州刺史十一月四日孟遷補充教練使太祖紀年錄及薛居正五代史皆曰大順元年李存孝攻邢州急邢帥孟遷以邢洺磁三州歸於我執朱溫之將王虔裕等三百人以獻而無月太祖紀年錄又曰太祖徙孟遷於太原以大將安金俊為邢洺團練使薛史孟遷傳曰大順元年二月遷執王虔裕等乞降武皇令安金俊代之今從實錄薛史虔裕傳曰時太祖大軍方討兗鄆未及救援邢人困而攜貳遷乃繫虔裕送於太原尋為所殺按是時全忠方攻時溥未討兗鄆也王虔裕傳誤克用以安金俊為邢洺團練使 壬寅王建攻邕

州

邕渠容翻

陳敬瑄遣其大將彭城楊儒將兵三千助刺史

毛湘守之湘出戰屢敗揚儒登城見建兵盛歎曰唐祚

盡矣王公治衆嚴而不殘殆可以庇民乎治直之翻遂帥所

部出降

帥讀曰率降戶江翻

建養以爲子更其姓名曰王宗儒

更工

衡翻

乙巳建留永平節度判官張琳爲邛南招安使引兵

還成都

復攻陳敬瑄也

琳許州人也陳敬瑄分兵布寨於犀浦

耶導江等縣

垂拱二年分成都縣置犀浦縣耶漢古縣唐並屬成都府九域志耶縣在府西四十

五里發城中民戶一丁

不計其家丁數多少一戶則發一丁

晝則穿重壕採

竹木運磚石

重直龍翻史炤曰古史考烏曹作塼

夜則登城擊柝巡警無

休息韋昭度營於唐橋王建營於東閭門外建事昭度

甚謹辛亥簡州將杜有遷執刺史負虔嵩降於建

負音云又

音運姓也建以有遷知州事汴將龐師古等衆號十萬度

淮聲言救楊行密攻下天長壬子下高郵

下者降下

二月

己未資州將侯元綽執刺史楊戡降於王建建以元綽

知州事乙丑加朱全忠守中書令龐師古引兵深

入淮南己巳與孫儒戰於陵亭

九域志泰州興化縣有陵亭鎮

師古兵

敗而還

遷從宣翻又如字

楊行密遣其將馬敬言將兵五千

乘虛襲據潤州李友將兵二萬屯青城將攻常州安仁

義劉威田頔敗劉建鋒於武進

去年孫儒使劉建鋒據常州晉分曲阿縣置武

進縣梁改為蘭陵隋唐垂拱二年又分晉陵置武進縣屬常州九域志縣有青城鎮

敬言仁義

威屯潤州友合肥人威慎縣人也李克用將兵攻雲

州防禦使赫連鐸克其東城鐸求救於盧龍節度使李

匡威匡威將兵三萬赴之丙子邢洺團練使安金俊中

流矢死

中竹仲翻考異曰實錄四月丙辰朔李克用遣安金俊率師攻雲州赫連鐸求援於幽州李

匡威匡威出師赴之戰於蔚州太原府軍大敗燕師執金俊獻於朝据太祖紀年錄攻雲州在三月舊紀實錄

皆在四月恐是約奏到然紀年錄不言克用敗蓋諱之也今從唐末見聞錄又紀年錄唐末見聞錄皆云金俊戰死實錄云執獻之亦誤

河東萬勝軍使申信叛降於鐸會幽州軍

至克用引還時溥求救於河東李克用遣其將石君

和將五百騎赴之李克用巡潞州以供具不厚怒昭

義節度使李克脩詬而答之

詬古候翻又許侯翻

克脩慙憤成疾

三月薨

考異曰太祖紀年錄太祖遣李罕之李存孝攻邢州十月且命班命由上黨而歸克脩性吝

嗇太祖左右微賂於克脩旬日間費數十萬尚以為供張不豐摘其事答克脩而歸太原俄而克脩憤恥寢疾薛史克脩傳曰龍紀元年武皇大舉以伐邢洺及班師因撫封於上黨按太祖紀但遣罕之存孝攻邢州不云

親行蓋罕之存孝園邢州克用但以大軍屯境上為之聲援去十月先還罕之存孝猶圍邢州故正月孟遷降也

克用表其弟決勝軍使克恭為昭義留後

為潞州叛克用張本

賜宣歙軍號寧國以楊行密為節度使 夏四月宿

州將張筠逐刺史張紹光附於時溥

去年朱全忠取宿州

朱全忠

帥諸軍討之

帥讀曰率

溥出兵掠碭山

碭徒郎翻

全忠遣牙內都

指揮使朱友裕擊之殺三千餘人擒石君和

考異曰邠象梁太

祖實錄前云四月丙辰後云乙卯溥出兵按長歷乙卯三月晦日實錄誤也

友裕全忠之子

也 乙丑陳敬瑄遣蜀州刺史任從海將兵二萬救邛

州戰敗欲以蜀州降王建敬瑄殺之

任音

以徐公鉅代

為蜀州刺史

鉅時
括翻

丙寅嘉州刺史朱實舉州降於建丙

子楚道土豪文武堅執戎州刺史謝承恩降於建

楚道
故楚

侯國漢立縣為犍為郡治
所梁置戎州楚蒲比翻

赫連鐸李匡威表請討李

克用

乘其不
利也

朱全忠亦上言克用終為國患今因其敗

臣請帥汴滑孟三軍

汴滑孟三鎮時皆
屬全忠帥讀曰率

與河北三鎮共

除之

河北三鎮謂盧龍李匡威
成德王鎔魏博羅弘信

乞朝廷命大臣為統帥

帥所
類翻

初張濬因楊復恭以進

事見二百五十四
卷僖宗廣明元年

復恭中

廢更附田令孜而薄復恭

更工衡翻改也附令孜事見中和元年

及復恭

再用事深恨之

襄王煊之亂田令孜往依陳敬瑄自是之後復恭再用事

上知濬與

復恭有隙特親倚之

考異曰舊傳再幸山南復恭代令孜為中尉罷濬知政事昭宗初

在藩邸深疾宦官復恭有援立大勳恃恩任事上心不平之當時趨向者多言濬有方略能畫大計復用為宰相判度支据舊紀實錄新紀表濬自光啟三年九月拜平章事至大順二年兵敗坐貶未嘗罷免舊傳誤也今從新

傳 濬亦以功名為已任每自比謝安裴度克用之討

黃巢屯河中也

見二百五十五卷僖宗中和二年三年

濬為都統判官

王鐸

為都統奏濬為判官

克用薄其為人聞其作相私謂詔使曰張公

好虛談而無實用

好呼到翻

傾覆之士也主上采其名而用

之他日交亂天下必是人也濬聞而銜之上從容與濬

論古今治亂

從千容翻

濬曰陛下英睿如此而中外制於彊

臣

言中則制於宦官外則制於方鎮

此臣日夜所痛心疾首也上問以

當今所急對曰莫若彊兵以服天下上於是廣募兵於

京師至十萬人及全忠等請討克用上命三省御史臺

四品以上議之

三省尚書省門下省中書省也四品以上尚書左右丞及六部侍郎門下中書

省自左右諫議以上御史臺自中丞以上皆四品也

以為不可者什六七杜讓能

劉崇望亦以為不可

杜讓能劉崇望二相也

濬欲倚外勢以擠楊

復恭

宰相主兵則外廷之勢重擯子細翻又子西翻

乃曰先帝再幸山南沙陀

所為也

謂光啟二年事見二百五十六卷

臣常慮其與河朔相表裏致

朝廷不能制今兩河藩鎮共請討之

河南獨朱全忠河北獨李匡威請討

克用耳餘皆不欲也

此千載一時

戴子亥翻

但乞陛下付臣兵柄旬月

可平失今不取後悔無及

考異曰舊濬傳曰會朱全忠誅秦宗權安居受殺李克

恭以潞州降全忠幽州李匡威雲州赫連鐸等奏請出軍討太原按時安居受未殺李克恭舊傳誤也太祖紀年錄曰太祖中和破賊時濬為諫議大夫出軍判官常以虛誕誘太祖太祖薄其為人及聞濬入中書太祖常

私於詔使曰張公傾覆之士先帝知其為人不至大任
主上付之重位必亂天下濬知之陰銜太祖按濬自僞
宗時為宰相紀誤孔緯曰濬言是也復恭曰先朝播遷雖藩鎮

跋扈亦由居中之臣措置未得其宜今宗廟甫安不宜

更造兵端上曰克用有興復大功謂破黃巢復京城也今乘其危

而攻之天下其謂我何緯曰陛下所言一時之體也張

濬所言萬世之利也昨計用兵饋運犒賞之費一二年

間未至匱乏在陛下斷志行之耳上以二相言協僊俛

從之斷丁亂反僊民尹反僊俛勉彊不得已之意曰茲事今付卿二人無貽

朕羞

觀帝此言亦知河東之不可伐矣

五月詔削奪克用官爵屬籍克用

賜姓故編之屬籍注已見前

以濬為河東行營都招討制置宣慰使

京兆尹孫揆副之以鎮國節度使韓建為都虞侯兼供軍糧料使以朱全忠為南面招討使李匡威為北面招討使赫連鐸副之濬奏給事中牛徽為行營判官徽曰

國家以喪亂之餘

喪息浪翻

欲為英武之舉橫挑彊寇

挑徒了翻

離諸侯心吾見其顛沛也

沛音貝

遂以衰疾固辭徽僧孺

之孫也

牛僧孺文宗大和中為相

李克恭驕恣不曉軍事潞人素

樂李克脩之簡儉

樂音洛

且死非其罪潞人憐之由是將

士離心初潞人叛孟氏牙將安居受等召河東兵以取

潞州

見二百五十五卷
僖宗中和三年

及孟遷以邢洺磁州歸李克用

克用寵任之以遷為軍城都虞侯羣從皆補右職

從才用翻

其後孟知祥見任於
莊宗亦遷之兄子也

居受等咸怨且懼昭義有精兵號

後院將克用既得三州將圖河朔令李克恭選後院將

尤驍勇者五百人送晉陽潞人惜之克恭遣牙將李元

審及小校馮霸部送晉陽至銅鞮

銅鞮漢縣唐屬潞州
九域志在州西北一

百四十五里校戶
教翻鞬丁奚翻

霸劫其衆以叛循山而南至於沁水

沁水漢縣名唐之沁水後魏泰寧郡地也北齊廢郡為永安縣隋開皇十八年改曰沁水唐屬澤州九域志在

州西北

衆已三千人李元審擊之為霸所傷歸於潞

考

異曰元審與霸同部送後院將霸所以能獨叛而元審所以得不死者蓋後院將有叛有不叛者叛者從霸不叛者從元審故克用益元審兵使討霸也此段考異疑有闕文

庚子克恭就元審所館

視之安居受帥其黨作亂

帥讀曰率

攻而焚之克恭元審皆

死衆推居受為留後附於朱全忠居受使召馮霸不至

居受懼出走為野人所殺霸引兵入潞自為留後

異曰考

編遺錄八月甲寅馮霸殺李克恭來降上請河陽帥朱
崇節領兵入潞兼充留後戊辰李克用圍之上遣葛從
周率驍勇夜銜枚斫營突入上黨以壯潞人之心薛居
正五代史梁太祖紀亦同按克用未嘗自圍潞也克恭
傳李元審戰傷收軍於潞五月十五日克恭視元審於
孔目吏劉崇之第是日州縣將安居受引兵攻克恭克
恭元審並遇害州民推居受為留後居受遣人召馮霸
於沁水霸不受命居受懼將奔歸朝廷至長子為野人
所殺傳首馮霸軍霸乃引眾據潞州自稱留後求援於
汴武皇令康君立討之汴將葛從周求援霸唐末見聞
錄曰五月十七日昭義狀申軍變殺節使當日點汾州
五縣土團將士赴昭義二十三日昭義僕射家累入府
新紀五月壬寅安居受殺李克恭按壬寅十七日乃報
到太原日也今從太祖紀年錄薛史克恭傳舊紀五月
丙午潞州軍亂殺李克恭監軍使薛績本亟克恭首獻
之於朝濬方起兵朝廷稱賀此蓋克恭首到日也舊紀

又曰七月全忠遣從周帥千騎入潞州唐太宗紀年錄薛史唐紀五月葛從周入潞太早蓋因克恭死終言之編遺錄薛史梁紀八月克恭死太晚蓋因從周入潞推本之又從周入潞全忠始請孫揆付鎮當在揆被執前也今克恭死從紀年錄從周入潞從舊紀

時朝廷方討克用聞克恭死朝臣

皆賀全忠遣河陽留後朱崇節將兵入潞州權知留後

克用遣康君立李存孝將兵圍之壬子張濬帥諸軍五

十二都及邠寧鄜夏雜虜合五萬人發京師

帥讀曰率下同鄜音

夫夏戶雅翻

上御安喜樓餞之

安喜樓安喜門樓也按楊復恭之亂上御安喜門劉崇望

謂禁軍曰天子親在街東督戰竊意安喜門即朱雀街東之安上門也

濬屏左右言於上

曰

屏必郢翻
又必正翻

俟臣先除外憂然後為陛下除內患

為于
偽翻

楊復恭竊聽聞之兩軍中尉餞濬於長樂坂

長樂坂在
長安城東

即漣坡樂音
洛坂音反

復恭屬濬酒

屬之
欲翻

濬辭以醉復恭戲之曰

相公杖鉞專征作態邪濬曰俟平賊還方見作態耳

未
能

成事而先為大言
此張濬之疎也

復恭益忌之癸丑削奪李罕之官爵

以附李
克用也

六月以孫揆為昭義節度使充招討副使 丁

巳茂州刺史李繼昌帥眾救成都己未王建擊斬之辛

酉資簡都制置應援使謝從本殺雅州刺史張承簡舉

城降建

資簡相去二百十六里簡州北至成都百五十里雅州與邛州接壤相去二百七十里王建圖

邛州以為根本兵威所及故謝從本以雅州降之

孫儒求好於朱全忠

表為淮南節度使未幾全忠殺其使者遂復為仇敵

呼好

到翻幾居豈翻復扶又翻

光啟末德州刺史盧彥威逐義昌節度

使楊全孜自稱留後

見二百五十六卷僖宗光啟元年攻莫杯翻

求旌節朝

廷未許至是王鎔羅弘信因張濬用兵為之請

為于偽

乃

以彥威為義昌節度使張濬會宣武鎮國靜難鳳翔

保大定難諸軍於晉州

難乃旦翻

更命義成軍曰宣義平

未以朱全忠為宣武宣義節度使

按方鎮表全忠以父名誠請改義成曰宣

義更工
衡翻

全忠以方有事徐揚徵兵遣戍殊為遼闊乃辭

宣義請以胡真為節度使從之然兵賦出入皆制於全

忠一如巡屬及胡真入為統軍竟以全忠為兩鎮節度

使罷淮南不領焉

領淮南見上卷
僖宗光啟三年

秋七月官軍至陰

地關

汾州靈石縣西南有陰地關
乙酉朔王師屯於陰地太原大將康君立以兵拒

考異曰舊紀七月

戰按君立時圍潞州何暇至
陰地關又不言勝負今不取

朱全忠遣驍將葛從周將

千騎潛自壺關夜抵潞州犯圍入城

九域志壺關西至
潞州二十五里宋

白曰壺關縣以山形似壺古於此置關故名考異曰舊紀實錄皆云從周權知留後又汴人圍澤州呼李罕之云葛司空已入潞府李存孝圍潞州呼城上人云葛僕射可歸大梁似從周實為留後也然薛居正五代史梁太祖紀云帝請以河陽節度使朱崇節為潞州留後實錄明年五月以前昭義節度使朱崇節為河陽節度使按河陽自解張全義圍以來常附屬於汴朱全忠以部將丁會張宗厚等為之留後非一人崇節蓋亦汴將為河陽留後全忠使權昭義留後既不能守復歸河陽耳諸書因謂之節度使蓋誤也後周但與崇節共守潞州以其名著故外人但
稱從周不數崇節也
又遣別將李謹李重胤鄧季筠

將兵攻李罕之於澤州又遣張全義朱友裕軍於澤州

之北為從周應援

考異曰編遺錄八月遣從周入上黨九月壬寅上往河陽令李謹救應

朱崇節又命朱友裕張全義簡精銳過屯於澤州北應
接取崇節從周以歸薛居正五代史梁太祖紀九月壬
寅上至河陽遣李讜引軍趨澤為晉人所敗帝又遣
朱友裕張全義率精兵至澤州北以為應援既而崇節
從周棄潞來歸戊申帝斬李重裔遂班師按讜等初圍
澤州時讜城上人云張相公圍太原葛司空已入潞府
是當時南兵方盛非孫揆就擒從周棄潞州之後也故置於此

臣已遣兵守潞州請孫揆赴鎮張濬亦恐昭義遂為汴
李筠下邑人也全忠奏

人所據分兵二千使揆將之趣潞州

趣七喻翻

八月乙丑揆

發晉州

九域志自晉州東至潞州三百八十五里

李存孝聞之以三百騎伏

於長子西谷中

長子漢縣唐屬潞州九域志在州西南四十五里

揆建牙杖節

褒衣大蓋擁衆而行

凡節度使其行前建牙旗杖所賜節褒衣大補博裾之衣大蓋即今

之清涼纖

存孝突出擒揆及賜旌節中使韓歸範牙兵五百

餘人追擊餘衆於刁黃嶺盡殺之存孝械揆及歸範紆

以素練

紆克夜翻維繫之也

徇於潞州城下曰朝廷以孫尚書為

潞帥命韓天使賜旌節

韓歸範銜天子之命故謂之天使帥所類翻使疏吏翻

葛

僕射可速歸大梁令尚書視事遂縛以獻於克用克用

囚之既而使人誘之欲以為河東副使

誘音西

揆曰吾天

子大臣兵敗而死分也

分扶問翻

豈能復事鎮使邪

節度使任居方

鎮孫揆鄙薄之呼
為鎮使復扶又翻

克用怒命以鋸鋸之鋸不能入揆罵

曰死狗奴鋸人當用板夾汝豈知邪乃以板夾之至死

罵不絕聲

丙寅孫儒攻潤州

蘇州刺史杜孺休到

官

去年朝廷命杜孺休刺蘇州

錢鏐密使沈粲害之會揚行密將李

友拔蘇州粲歸杭州鏐欲歸罪於粲而殺之粲奔孫儒

王建退屯漢州

自成都退屯漢州

陳敬瑄括富民財以供

軍置徵督院逼以桎梏箠楚使各自占凡有財者如匿

賊虛占急徵

箠止崇翻占之瞻翻無其財而自占為有謂之虛占

咸不聊生李罕

之告急於李克用

為汴兵所圍也

克用遣李存孝將五千騎救

之九月壬寅朱全忠軍於河陽汴軍之初圍澤州也

呼李罕之曰相公每恃河東輕絕當道

當道猶云本道汴軍自謂也

今張相公圍太原葛僕射入潞府

張相公謂張濬葛僕射謂葛從周

旬

月之間沙陀無穴自藏相公何路求生邪及李存孝至

引精騎五百繞汴寨呼曰

呼火故翻

我沙陀之求穴者也欲

得爾肉以飽士卒可令肥者出關汴將鄧季筠亦驍將

也引兵出戰存孝生擒之是夕李讜李重胤收衆遁去

存孝罕之隨而擊之至馬牢山大破之斬獲萬計追至

懷州而還存孝復引兵攻潞州

復扶又翻

葛從周朱宗節棄

潞州而歸戊申全忠庭責諸將撓敗之罪

撓奴教翻

斬李讜

李重脣而還

考異曰唐太祖紀年錄六月朱崇節葛從周據潞州李重脣鄧季筠張全義將兵

七萬攻澤州李存孝將三千騎赴援初汴軍攻城門呼李罕之云云李存孝憤其言引鐵騎五百追擊入李筠營門生獲其都將十數是夜汴將李讜收軍而遁存孝罕之追擊至馬牢山斬首萬級追襲掩擊至於懷州而還存孝復引軍攻潞州九月二日葛從周帥衆棄城而遁唐末見聞錄閏九月昭義軍前狀申昭義軍人拔滅逃遁收下城池擒獲到餘黨五十人中縛送上至二十日行營都指揮使李存孝迴戈歸府薛居正五代史梁

太祖紀九月壬寅帝至河陽遣李讜引軍趨澤潞行至馬牢川為晉人所敗帝又遣朱友裕張全義率精兵至澤州北以為應援既而崇節從周棄潞來歸戊申帝廷責諸將敗軍之罪斬李重胤以徇遂班師焉實錄九月甲申朔康君立急攻潞州朱全忠駐河陽遣李讜引軍趨澤潞至馬牢山川與并師大戰不利鄧季筠被執復遣朱友裕張全義至澤州北應援葛從周朱崇節率衆棄潞州歸按六月李存孝若已破李讜追至懷州懷州去河陽止一程豈得九月方到河陽讜之敗必在九月戊申前一兩日也蓋紀年錄因從周據潞州事終言之九月甲申朔十九日壬寅二十五日戊申若全忠至河陽始遣讜等趣澤潞既敗而從周等棄潞來歸七日之間豈容許事蓋薛史因讜敗追本前事耳若九月二日從周已棄潞州何得十九日後攻澤州者猶云葛司空入潞府手蓋實錄承紀年錄而誤也今李克用以康君全忠往來月日從薛史事則兼采諸書

李克用以康君

立為昭義留後李存孝為汾州刺史存孝自謂擒孫揆
功大當鎮昭義而君立得之憤恚不食者數日縱意刑
殺始有叛克用之志李匡威攻蔚州虜其刺史邢善益
赫連鐸引吐蕃黠戛斯衆數萬攻遮虜軍殺其軍使劉
胡子克用遣其將李存信擊之不勝更命李嗣源為存
信之副遂破之克用以大軍繼其後匡威鐸皆敗走

考

異曰太祖紀年錄是月幽帥李匡威會赫連鐸引吐蕃
黠戛斯之衆十萬寇我北鄙攻遮虜軍太祖御親軍出
塞營於渾河川之田村李存孝引前鋒與賊戰於樂安
鎮賊軍大敗遁走舊紀九月幽州雲州蕃漢兵三萬攻

雁門太原府將李存信薛阿檀擊敗之實錄閏月甲寅朔幽州李匡威下蔚州克用援兵至匡威大敗赫連鐸引吐蕃點戛斯之衆攻遮虜軍克用營渾河川戰於樂安鎮破之鐸乃退軍此蓋約奏到日唐末見聞錄十一月十五日發往向北打鹿有使報稱幽州李匡威收却蔚州十六日至十八日旋發諸州兵士至軍前二十九日大捷有榜曉告殺燕軍三萬餘人十九日知客押衙苗仲周賣榜到殺得退渾一千帳二十九日下復云十九日亦誤今但獲匡威之子武州刺史仁宗新志河東道有武州繫此月不書日及鐸之壻俘斬萬計李嗣源性謹重廉儉領文德縣闕其建置之年

諸將相會各自詫勇略

說且亞翻誇也

嗣源獨默然徐曰諸君

喜以口擊賊

喜許記翻

嗣源但以手擊賊耳衆慙而止楊

行密以其將張行周為常州制置使閏月孫儒遣劉建

鋒攻拔常州殺行周遂圍蘇州

考異曰吳錄十一月孫儒攻破望亭無錫諸

屯遂至蘇州今從吳越備史在閏月

邳州刺史毛湘本田令孜親吏王

建攻之急食盡救兵不至壬戌湘謂都知兵馬使任可

知曰吾不忍負田軍容吏民何罪爾可持吾頭歸王建

乃沐浴以俟刃可知斬湘及二子降於建士民皆泣甲

戌建持永平旌節入邳州以節度判官張琳知留後

時

命以邳州建永平軍王建為節度繕完城隍撫安夷獠

使是年正月建攻邳州至是克之

經營蜀雅

九域志邛州北至蜀州七十里西南至雅州一百六十里獠魯皓翻

冬十月癸

未朔建引兵還成都蜀州將李行周逐徐公鉢舉城降

建

鉢辛律翻

乙酉朱全忠自河陽如滑州視事

朱全忠既領宣義節

遂如滑州視事

遣使者請糧馬及假道於魏以伐河東羅弘信

不許又請於鎮鎮人亦不許全忠乃自黎陽濟河擊魏

加邠寧節度使王行瑜侍中佑國節度使張全義同

平章事官軍出陰地關遊兵至於汾州李克用遣薛

志勤李承嗣將騎三千營於洪洞

洪洞漢揚縣義寧元年改曰洪洞取縣北

洪洞嶺為名屬晉州九域志在州北五十五里又北二百九十五里至汾州

李存孝將兵五

千營於趙城

義寧元年分霍邑置趙城縣以春秋時晉獻公滅耿以賜趙夙因謂之趙城屬晉州

九域志在州北八十五里宋白曰史記周穆王封造父於趙城注云在河東永安縣余按宋白既以趙城為造父所封之地此又引鎮國節度使韓建以壯士三百夜

史記注何所折衷哉

襲存孝營存孝知之設伏以待之建兵不利靜難鳳翔

之兵不戰而走

難乃旦翻

河東兵乘勝逐北抵晉州西門張

濬出戰又敗官軍死者近三千人

近其靳翻

靜難鳳翔保大

定難之軍先度河西歸濬獨有禁軍及宣武軍合萬人

與韓建閉城拒守自是不敢復出

復扶又翻

存孝引兵攻絳

州

九域志晉州南至絳州一百二十五里

十一月刺史張行恭棄城走存

孝進攻晉州三日與其衆謀曰張濬宰相俘之無益天

子禁兵不宜加害乃退五十里而軍

李存孝雖悍猶不敢攻執宰相犯獵

禁兵分尚存故也

濬建自含口遁去

水經注洮水源自河東聞喜縣清襄山其水東逕大

嶺下西流出謂之含口又西合於涑水即含山之口也

存孝取晉絳二州大掠慈

隰之境先是克用遣韓歸範歸朝

韓歸範與孫揆俱擒李克用遣之歸朝

附表訟冤

考異曰實錄十一月王師入陰地闕至汾隰李克用遣將薛阿檀李承嗣拒之李存信

以兵五千圍趙城韓建以華州兵戰存信設伏擊破之
邠鳳之師未戰而走禁軍自潰由是大敗存信直壓晉
州西門引軍攻絳州十二月壬午朔晉州刺史張行恭
棄城而遁韓建以諸軍保晉州李存信追擊戰敗退保
絳州張濬以汴卒禁軍屯晉州存信攻之三日濬建拔
晉絳遁還存信收二州舊紀克用遣李存信薛阿檀拒
王師於陰地三戰三捷由是河西鄭夏邠岐之軍渡河
西歸韓建以諸軍保平陽存信追之建軍又敗建退保
絳州張濬在晉州存信攻之三日相與謀云云遂退舍
五十里十二月壬午朔濬建拔晉絳遁去存信收晉絳
大掠河中四郡張濬傳曰十月濬軍至陰地邠岐華三
鎮之師營平陽李存孝擊之一戰而敗進攻晉州薛居
正五代史武皇紀曰十月張濬之師入晉州遊軍至邠
濕武皇遣薛鐵山李承嗣將騎三千出陰地關營於洪
洞遣李存孝將兵五千營於趙城華州韓建以壯士三
百人冒犯存孝之營存孝追擊直壓晉州西門張濬之

師出戰為存孝所敗自是閉壁不出存孝引軍攻絳州
李存孝傳曰十月存孝引收潞之師圍張濬於平陽云
云存孝引軍攻絳州十一月刺史張行恭棄城而去張
濬韓建亦由含口而遁存孝收晉絳太祖紀年錄十月
張濬之師入陰地闕犯汾隰令薛鐵山李承嗣將騎三
千出陰地繼發李存孝將兵五千進擊營於趙城敗韓
建直壓晉州西門自是閉壁不出存孝攻絳州十二月
晉州刺史張行恭棄城遁建濬由含山路逃遁遂收晉
絳初濬部禁軍至晉州邠鳳之師望風遁歸蓋楊復恭
陰沮之也唐末見聞錄曰八月五日相公差晉州捉到
天使閻大夫入京奏事無貢表曰臣某言今月二十
六日臣所部南界晉州長寧關使張承暉等投臣當道
齎到宰臣張濬榜一道內稱招討處置使兼錄到詔白
云陛下削臣屬籍奪臣本官仍欲會兵討問云云唐補
紀曰朱全忠自攻破徐州頻貢章表克用與朱玫同立
襄王以為大逆其朱玫以下並已誅鋤克用時最為魁

首據其罪狀請舉天兵臣率師闕東犄角相應朝廷遂以宰臣張濬為都統授崔胤為河中節度應援使大軍行到同州克用領蕃漢馬步稱三十萬入河北界其張濬使人探朱全忠兵馬並不來相應乃於昭義西與太原交戰不利而回朝廷知為全忠所賣便差使至克用所與賞給令回貶都統張濬於雲夢除崔胤於嶺外薛史李承嗣傳初大軍入陰地薛志勤與承嗣率騎三千抗之敗韓建之軍於蒙坑進收晉絳以功授忻州刺史時鳳翔軍營霍邑承嗣帥一軍收之岐人夜遁追擊至趙城合大軍攻平陽旬有三日而拔按李存信傳無攻晉絳事蓋舊紀十月存孝已背太原故此戰皆云存信實錄因之而誤据五代紀傳太祖紀年錄當是存孝又隰州隸河中節度所云入陰地闕犯汾隰者蓋謂汾水之旁下濕曰隰耳又紀年錄實錄以張行恭為晉州刺史亦誤也今從薛史晉州刺史若已走則濬建安能保城實錄誤也今從李存孝傳唐補紀云崔胤為河中節

度尤為疏繆自餘諸書參取之

言臣父子三代受恩四朝破麗勛翦黃

巢黜襄王存易定

執宜國昌克用三代歷武宣懿僖四朝破麗勛見二百五十一卷懿宗咸

通十年翦黃巢見二百五十五卷僖宗中和三年四年黜襄王見二百五十六卷光啟二年存易定見光啟元

年

致陛下今日冠通天之冠

日冠古玩

佩白玉之璽未必

非臣之力也若以攻雲州為臣罪則拓跋思恭之取廊

延

拓跋思恭取廊延以授其弟思孝

朱全忠之侵徐鄆

謂朱全忠攻時溥於徐攻朱瑄

於鄆事並見上

何獨不討賞彼誅此臣豈無辭且朝廷當貼危

之時則譽臣為韓彭伊呂

貼余廉翻又丁念翻臨及既危曰貼危譽音余稱譽

安之後則罵臣為戎羯胡夷今天下握兵立功之人獨
不懼陛下他日之罵乎況臣果有大罪六師征之自有
典刑何必幸臣之弱而後取之邪今張濬既出師則固
難束手已集蕃漢兵五十萬欲直抵蒲潼與濬格鬪若
其不勝甘從削奪不然方且輕騎叩閭頓首丹陛訴姦
回於陛下之宸坐

宸隱豈翻記天子負宸南面而立宸
畫斧屏風也設之戶牖間坐徂卧翻

納制敕於先帝之廟庭然後自拘司敗恭俟鈇質

司敗
即司

冠之
官

表至濬已敗朝廷震恐濬與韓建踰王屋至河陽

撤民屋為棧以濟河

河南王屋縣有王屋山王屋漢河東垣縣地後魏置長平縣後周置

王屋郡隋廢郡為縣九域志縣在孟州西北一百三十里考異曰實錄明年二月云時張濬韓建久敗後為

克用騎將李存信所追至是方自含山踰王屋出河清達於河陽河溢無舟楫建壞民廬舍為木壘數百度河人多覆溺似太晚今因濬建走終言之 師徒失亡殆盡是役也朝廷倚朱

全忠及河朔三鎮及濬至晉州全忠方連兵徐鄆雖遣將攻澤州而身不至行營乃求兵糧於鎮魏鎮魏倚河

東為扞蔽皆不出兵惟華邠鳳翔鄆夏之兵會之

華戶化翻

鄆當作廊詳見辭誤

兵未交而孫揆被擒幽雲俱敗

幽李匡威雲赫連鐸 楊

復恭復從中沮之故濬軍望風自潰

復從扶又翻史言張濬志節可憐

十二月孫儒拔蘇州殺李友

考異曰莊宗列傳揚行密壽州壽春人初據

本州秦宗權遣孫儒及行密同攻陷揚州儒專據之龍紀元年儒出軍攻宣州行密襲據揚州稱留後北通時溥儒引軍攻之大順元年行密禦備力竭率衆夜遁出據宣州此說最為差誤國朝開寶中薛居正修五代史江南未平不見本國舊史據昭遠所記及唐年補錄作行密傳但知行密非壽春人改為廬州又知行密非受宗權命與孫儒同陷揚州餘皆無次叙今按吳錄太祖紀及高遠唐烈祖實錄行密傳云光啟三年十月秦彦畢師鐸出走行密入揚州十一月孫儒圍揚州文德元年四月儒陷揚州行密奔廬州八月自廬州帥兵攻宣州龍紀元年六月陷宣州殺趙鐸大順二年七月孫儒再渡江攻宣州景福元年六月執斬儒復歸揚州且龍

紀元年孫儒方彊行密新得宣州安能襲據揚州踰年
哉近修唐書行密傳全用吳錄事迹乃云儒進攻行密
行密復入揚州北通時溥扞儒朱全忠遣龐師古助行
密敗於高郵行密懼退還宣州蓋承莊宗列傳五代史
之誤而不
考正也 安仁義等聞之焚潤州廬舍夜遁儒使沈榮

守蘇州又遣其將歸傳道守潤州

揚行密遣安仁義破錢鏐之兵而取常蘇

潤孫儒又從而奪之民之死於兵者不知其幾矣

辛丑汴將丁會葛從周擊魏

度河取黎陽臨河

黎陽漢古縣唐屬衛州九域志在州東北一百二十里隋分黎陽縣置臨

河縣唐屬相州

龐師古霍存下淇門衛縣

衛漢朝歌縣紂所都朝歌城在今縣西隋

大業二年改曰衛縣唐屬衛州九域志衛州汲縣有淇門鎮

朱全忠自以大軍繼之

是歲置昇州於上元縣以張雄為刺史

至德二載以潤州江寧縣

置昇州上元二年廢今復置

考異曰新地理志光啟

三年以上元等四縣置昇州張雄傳大順初以上元為

昇州授雄刺史吳錄馮弘鐸傳大順元年復以上元

為昇州命弘鐸為刺史按是時雄尚存今從雄傳

二年春正月羅弘信軍於內黃丙辰朱全忠擊之五戰

皆捷至永定橋斬首萬餘級弘信懼遣使厚幣請和全

忠命止焚掠歸其俘還軍河上魏博自是服於汴庚

申制以太保門下侍郎同平章事孔緯為荆南節度使

中書侍郎同平章事張濬為鄂岳觀察使

二人罷相以晉絳喪師也

以翰林學士承旨兵部侍郎崔昭緯同平章事御史中

丞徐彥若為戶部侍郎同平章事昭緯慎由從子

崔慎由相

宣宗從才用翻

彥若商之子也

徐商見二百四十九卷宣宗大中十二年

楊復恭使

人劫孔緯於長樂坡

長樂坡即長樂坂

斬其旌節資裝俱盡緯

僅能自免李克用復遣使上表曰

復扶又翻

張濬以陛下萬

代之業邀自己一時之功知臣與朱溫深仇私相連結

臣今身無官爵名是罪人不敢歸陛下藩方且欲於河

中寄寓進退行止伏俟指麾

竊謂克用此表楊復恭密教之也

詔再貶

孔緯均州刺史張濬連州刺史賜克用詔悉復其官爵

使歸晉陽

考異曰舊紀太原軍屯晉州克用遣中使韓歸範還朝因上表訴寃言賊臣張濬依倚

全忠離間功臣朝廷欲令釋憾下羣臣議其可否左僕射韋昭度等議云云在十二月按是年昭度討陳敬瑄

舊紀誤今從實錄

孫儒盡舉淮蔡之兵濟江癸酉自潤州轉

戰而南田頔安仁義屢敗退揚行密城戍皆望風奔潰

儒將李從立奄至宣州東溪

東溪在宣城東今謂之宛溪

行密守備

尚未固衆心危懼夜使其將合肥臺濠將五百人屯溪

西

溪西即宛溪之西

濠使士卒傳呼往返數四從立以為大衆

繼至遽引去儒前軍至溧水

溧水漢溧陽縣隋分置溧水縣時屬昇州九域志在

州東八十五里

行密使都指揮使李神福拒之神福陽退以示

怯儒軍不設備神福夜帥精兵襲之俘斬千人

帥讀曰率下同

二月加李克用守中書令復李罕之官爵再貶張濬

繡州司戶 韋昭度將諸道兵十餘萬討陳敬瑄三年

不能克

文德元年遣昭度討西川至是三年矣

饋運不繼朝議欲息兵三

月乙亥制復敬瑄官爵

考異曰新紀二月乙巳赦陳敬瑄已未詔王建罷兵不受命

十國紀年亦曰二月乙巳復敬瑄官爵按二月辛巳朔無己未新紀誤也今從實錄令顧彥朗王

建各帥衆歸鎮

使顧彥朗歸梓州王建歸申州

王師範遣都指揮使

盧弘擊棣州刺史張蟾弘引兵還攻師範師範使人以

重賂迎之曰師範童駮

駮語駮翻
癡愚也

不堪重任願得避位

使保首領公之仁也弘以師範年少信之不設備

少詩
照翻

師範密謂小校安邱劉鄩曰

安邱漢縣古根牟國唐屬
密州九域志在州西北一

百二十里校戶
教翻鄩徐心翻

汝能殺弘吾以汝為大將弘入城師範

伏甲而享之鄩殺弘於座及其黨數人師範慰諭士卒

厚賞重誓自將以攻棣州執張蟾斬之崔安潛逃歸京

師師範以鄆為馬步副都指揮使詔以師範為平盧節

度使師範和謹好學

好呼到翻

每本縣令到官師範輒備儀

衛往謁之令不敢當師範命客將挾持令坐於聽事

客將

主唱導傭贊賓客漢晉鈴下威儀之職將即亮翻令力丁翻聽讀曰廳

自稱百姓王師範

拜之於庭僚佐或諫師範曰吾敬桑梓所以教子孫不

忘本也

詩維桑與梓必恭敬止注云父之所樹子不敢不恭敬

張濬至藍田逃

奔華州依韓建與孔緯密求救於朱全忠全忠上表為

緯濬訟寃

為于偽翻

朝廷不得已並聽自便緯至商州而還

亦寓居華州

邢洺節度使安知建潛通朱全忠

安金俊既

死李克用以安知建代鎮邢洺

李克用表以李存孝代之知建懼奔青

州朝廷以知建為神武統軍知建帥麾下三千人將詣

京師過鄆州朱瑄與克用方睦伏兵河上斬之

薛史安知建介

青州自棣州沂河歸朝朱瑄邀斬之河上帥讀曰率

傳首晉陽夏四月有彗星

見於三台

斗魁下六星兩兩而比曰三台見賢遍翻

東行入太微長十丈餘

長直甲申赦天下

成都城中乏食弃兒滿路

父子不能相贍

至於民有潛入行營販米入城者邏者得之

邏郎以白佐翻

韋昭度昭度曰滿城饑甚忍不救之釋勿問亦有白陳敬瑄者敬瑄曰吾恨無術以救餓者彼能如是勿禁也由是販者浸多然所致不過斗升截筒徑寸半深五分量米而鬻之每筒百餘錢餓殍狼籍

深式禁翻量音良殍被表翻

軍

民彊弱相陵將吏斬之不能禁乃更為酷法或斷腰或斜劈

斷丁管翻劈普壁翻

死者相繼而為者不止人耳目既熟不

以為懼吏民日窘

窘巨隕翻

多謀出降敬瑄悉捕其族黨殺

之慘毒備至内外都指揮使眉州刺史成都徐耕性仁

恕所全活數千人田令孜曰公掌生殺而不刑一人有

異志邪耕懼夜取俘囚戮於市王建見罷兵制書曰大

功垂成奈何棄之謀於周庠庠勸建請韋公還朝獨攻

成都克而有之

朝真遙翻

建表請陳敬瑄田令孜罪不可赦

請恐當作稱考異曰十國紀年朝議以建不奉詔而不能制更授西川行營招討制置使按此命蓋在昭度還

朝之後也願畢命以圖成功昭度無如之何由是未能東還

建說昭度曰今關東藩鎮迭相吞噬此腹心之疾也相

公宜早歸廟堂與天子謀之敬瑄疥癰耳

癰與癰同音息淺翻

當

以日月制之青建可辨也昭度猶豫未決庚子建陰令

東川將唐友通等擒昭度親吏駱保於行府門鬻食之

韋昭度攻成都置行府以治事鬻力充翻

云其盜軍糧昭度大懼遽稱疾以

印節授建牒建知三使留後

三使節度使招撫使制置使也

兼行營招

討使即日東還建送至新都跪觴馬前泣拜而別

跪觴而

奉觴也

昭度甫出劔門

劔門諸葛亮立闕唐聖歷二年分普安永歸陰平置劔門縣屬劔州

九域志在州東北五十五里

即以兵守之不復內東軍

復扶又翻

昭度至

京師除東郡留守

考異曰舊紀龍紀元年正月昭度為東都留守實錄大順二年三月乙

亥復陳敬瑄官爵丙子以昭度為東都留守按昭度已
除留守不領西川節度及招討使則便應釋兵東歸不
應更留在彼縱使彊留諸軍亦安肯稟服王建亦何必
更說之云相公宜早歸廟堂與天子籌之舊傳建脅說
昭度奏請還都建以重兵守劍門急攻成都昭度還以
檢校司空充東都留守新傳亦同蓋今年三月既復敬
瑄官爵但召昭度還朝王建不肯罷兵昭度為所牽率
亦同執奏以為敬瑄不可赦既而為建所脅授兵東歸
朝廷責其進退失據故左遷留守如新舊傳所云者是
也今從之又昭度初圍成都楊守亮為招討副使顧彥
朗為行軍司馬王建為都指揮使同在成都城下及昭
度東歸時獨建在彼以兵授之不見二人者按三月乙
亥詔書但云令彥朗各歸本鎮則是守亮先已歸也彥
朗得此詔必亦歸獨昭度與建留在彼耳然建令東川
將唐友通食駱保是彥朗
身歸而留兵攻成都也

建急攻成都環城烽塹亘五

十里

環音患

有狗屠王鷄

鷄亦音翻

請詐得罪亡入城說之

說式

芮翻

使上下離心建遣之鷄入見陳敬瑄田令孜則言建

兵疲食盡將遁矣出則鬻茶於市陰為吏民稱建英武

兵勢彊盛

為于偽翻

由是敬瑄等懈於守備

懈古隘翻

而眾心危

懼建又遣其將京兆鄭渥詐降以覘之敬瑄以為將使

乘城既而復以詐得歸

復扶又翻又如字

建由是悉知城中虛

實以渥為親從都指揮使更姓名曰王宗渥

從才用翻更工衡翻

以武安節度使周岳為嶺南西道節度使

方鎮表中和三年升

湖南觀察為欽化軍節度光啟元年改武安軍

李克用大舉擊赫連鐸敗其

兵於河上

北河之上
敗補邁翻

進圍雲州

楊行密遣其將劉威

朱延壽將兵三萬擊孫儒於黃池

九域志宣州當塗縣有黃池鎮

威等

大敗延壽舒城人也孫儒軍於黃池五月大水諸營皆

沒乃還楊州使其將康晁據和州

晁于放翻

安景思據滁州

和滁相去一百五十里

丙午立皇子祐為德王

楊行密遣其

將李神福攻和滁康晁降

降戶江翻

安景思走

秋七月李

克用急攻雲州赫連鐸食盡奔吐谷渾部

赫連鐸本吐谷渾酋長開

成中其父帥種人三千帳自歸守雲州十五年至是而亡考異曰舊紀實錄皆云克用率兵出井陘屯常山

大掠深趙盧龍李匡威自率步騎萬餘援王鎔按唐太祖紀年錄是時克用方攻赫連鐸既平雲州乃封王鎔

實錄蓋因舊紀之誤又紀年錄曰七月太祖進軍至於柳城會赫連鐸力屈食盡奔入吐渾云云實錄云克用

遣將急攻雲州蓋以前云克用親討王鎔故也按紀年錄討王鎔在後實錄誤既而歸於幽州

克用表大將石善友為大同防禦使朱全忠遣使與

楊行密約共攻孫儒儒恃其兵彊欲先滅行密後敵全

忠移牒藩鎮數行密全忠之罪且曰俟平宣汴當引兵

入朝除君側之惡數所具翻於是悉焚揚州廬舍盡驅丁壯

及婦女度江殺老弱以充食行密將張訓李德誠潛入

揚州滅餘火得穀數十萬斛以賑饑民

揚州之民仇孫儒而德揚行密

使孫儒不死於宣州揚州之民亦必歸揚行密矣

泗州刺史張諫貸數萬斛以

給軍訓以行密之命饋之諫由是德行密

為張諫降行密張本

邢洺節度使李存孝勸李克用攻鎮州克用從之八月

克用南巡澤潞遂涉懷孟之境朱全忠遣其將丁會

攻宿州克其外城

元年夏四月宿州將張筠附於時溥

乙未孫儒自蘇

州出屯廣德

沈約曰廣德縣疑吳所立劉昫曰廣德縣漢故障也宋分宣州之廣德吳興之故障

置緩安縣唐至德二年改為廣德以縣界廣德故城為名屬宣州九域志在州東一百二十里楊行密

引兵拒之儒圍其寨行密將上蔡李簡帥百餘人力戰

破寨拔行密出之

帥讀曰率

王建攻陳敬瑄益急敬瑄出

戰輒敗巡內州縣率為建所取威戎節度使楊晟時饋

之食建以兵據新都彭州道絕

田令孜以彭州為威戎軍

敬瑄出慰

勉士卒皆不應卒丑田令孜登城謂建曰老夫歸於公

甚厚何見困如是建曰父子之恩豈敢忘

言令孜養建為假子也

但朝廷命建討不受代者不得不然儻大師改圖建復

何求

大帥謂陳敬瑄復扶又翻

是夕令孜自攜西川印節詣建營授

之

舊書龍紀元年五月壬辰朔漢州刺史王建陷成都遷陳敬瑄於雅州建自稱兵馬留後復用田令孜為

監軍記事既有不同而紀年前後復有兩年之差

將士皆呼萬歲建泣謝請復

為父子如初先是建常誘其將士曰成都城中繁盛如

花錦一朝得之金帛子女恣汝曹所取節度使與汝曹

迭日為之耳

先悉薦翻

壬寅敬瑄開門迎建

禧宗廣明元年陳敬瑄鎮西川

至是而亡

建署其將張勅為馬步斬斫使使先入城乃謂將

士曰吾與汝曹三年百戰今始得城汝曹不憂不富貴

慎勿焚掠坊市吾已委張勅護之矣彼幸執而白我我

猶得救之若先斬而後白我亦不能救也既而士卒有

犯令者勅執百餘人皆捶其胷而殺之積尸於市衆莫

敢犯故時人謂勅為張打胷

勅渠京翻
捶止榮翻

癸卯建入城自

稱西川留後小校韓武數於使廳上馬牙司止之

使廳節度

使廳事也牙司吏也掌使牙之事數所角翻上時掌翻

武怒曰司徒許我迭日為

節度使上馬何為建密遣人刺殺之

刺七亦翻

初陳敬瑄之

拒朝命也田令孜欲盜其軍政謂敬瑄曰三兄尊重

敬瑄

第三朝
直遙翻

軍務煩勞不若盡以相付日具記事咨呈兄但

高居自逸而已敬瑄素無智能忻然許之自是軍事皆

不由己以至於亡建表敬瑄子陶為雅州刺史使隨陶

之官明年罷歸寓居新津以一縣租賦贍之癸丑建分

遣士卒就食諸州更文武堅姓名曰王宗阮謝從本曰

王宗本

更其姓名以為
假子更工衡翻

陳敬瑄將佐有器幹者建皆禮

而用之

史言王建所
以能有蜀

六軍十二衛觀軍容使左神策

軍中尉楊復恭總宿衛兵專制朝政諸假子皆為節度

使刺史又養宦官子六百人皆為監軍假子龍劔節度

使守貞武定節度使守忠不輸貢賦上表訛薄朝廷

龍劔

節度領龍劔利閬四州武定節度領洋果階扶四州

上舅王瓌求節度使上訪於

復恭復恭以為不可瓌怒詬之

詬古候翻又許候翻

瓌出入禁中

頗用事復恭惡之奏以為黔南節度使

是時以黔中節度為永泰軍黔

中以南則羈縻諸蠻州矣未知黔南節度置於何所豈楊復恭欲殺王瓌特創置此鎮以授之邪惡烏路翻黔

渠今翻

至吉柏津

利州益昌縣有桔柏津益昌驛有古柏土人謂之桔柏因以名津據楊復恭傳

王瓌取道興元至桔柏津

今山南西道節度使楊守亮覆諸江中宗

族賓客皆死以舟敗聞上知復恭所為深恨之李順節

既寵貴與復恭爭權盡以復恭陰事告上上乃出復恭

為鳳翔監軍復恭慍懟不肯行

懟於運翻怒也
懟直類翻怨也

稱疾求

致仕九月乙卯以復恭為上將軍致仕賜以几杖使者

致詔命還復恭潛遣腹心張綰刺殺之

刺七
亦翻

加護國

節度使王重盈兼中書令東川節度使顧彥朗薨軍

中推其弟彥暉知留後冬十月壬午宿州刺史張筠

降於丁會癸未以永平節度使王建為西川節度使

甲申廢永平軍

去年置永平節鎮於邛州以授王建建既得西川授以西川節而廢永平軍建

志也建既得西川留心政事容納直言好施樂士

好呼到翻施式

政翻用人各盡其才謙恭儉素然多忌好殺諸將有功名

者多因事誅之楊復恭居第近玉山營

據舊史楊復恭居第在昭

化里近其新翻

假子守信為玉山軍使數往省之

數所角翻省悉景翻

或

告復恭與守信謀反乙酉上御安喜樓陳兵自衛命天

威都將李順節神策軍使李守節將兵攻其第張綰帥

家眾拒戰

家眾楊復恭私所蓄養之人也帥讀曰率

守信引兵助之順節等

不能克丙戌禁兵守含光門

含光門皇城南面西來第一門也

俟其開

欲出掠兩市遇劉崇望立馬諭之曰天子親在街東督

戰汝曹皆宿衛之士當於樓前殺賊立功勿貪小利自

取惡名衆皆曰諾遂從崇望而東守信之衆望見兵來

遂潰走守信與復恭挈其族自通化門出趣興元

通化門長

安城東面北來第一門趣七喻翻

永安都頭權安追之擒張綰斬之

永安

都亦神策第五

復恭至興元楊守亮楊守忠楊守貞及綿

十四都之一

州刺史楊守厚同舉兵拒朝廷以討李順節為名守厚

亦復恭假子也 李克用攻王鎔大破鎮兵於龍尾崗

斬獲萬計遂拔臨城攻元氏柏鄉

薛居正曰龍尾崗在臨城西北臨城本房

子天寶元年更名與元氏柏鄉皆屬趙州九域志臨城在趙州西南一百三里 考異曰唐太祖紀年錄曰攻

元氏斬首千級進拔電水攻柏鄉按電水屬易州克用方攻鎮州以救易定必不取其地恐誤也

李匡

威引幽州兵救之克用大掠而還軍於邢州 十一月

曹州都將郭銖殺刺史郭詞降於朱全忠

曹州天平節度使朱瑄巡

屬也

泰寧節度使朱瑾將萬餘人攻單州

唐末以宋州之單父碭山

曹州之成武兗州之魚臺置單州九域志兗州西南至單州二百八十里單州時屬朱全忠單音善

乙

丑時溥將劉知俊帥衆二千降於朱全忠

帥讀曰率

知俊沛

人徐之驍將也溥軍自是不振全忠以知俊為左右開

道指揮使

辛未壽州將劉弘鄂惡孫儒殘暴

惡烏路翻下同

舉州降朱全忠

十二月乙酉汴將丁會張歸霸與朱

瑾戰於金鄉大破之殺獲殆盡瑾單騎走免

天威都

將李順節恃恩驕橫

橫戶孟翻

出入常以兵自隨兩軍中尉

劉景宣西門君遂惡之白上恐其作亂戊子二人以詔

召順節順節入至銀臺門二人邀順節於仗舍坐語供

奉官似先知自後斬其首

似先知宦官也舊書帝紀作部將嗣光審斬順節頭考

異曰唐補紀景福二年四月十七日夜見掃星長十大餘承旨陳匡用奏當有亂臣將入宮內昭宗乳母名曰芥子自即位加夫人衆呼白婆左神策軍天威都軍使胡弘立先是軍中馬騎官巧佞取容朝廷達官多重之楊復恭為軍主與改姓名為楊守節主上每出畋遊經天威軍內其楊守節以儉巧趨附乞與主上為兒既而允從頗生驕縱於是引聖人入堂室令妻妾對於庭簷或入內中經旬不出致主有撫楹之咎為臣懷通室之非承醉奏云王印金箱兒未曾識望阿郎畧將宣示以慰平生其白婆在側曰此寶非凡人得見不用發言於是奏曰除此老嫗方應太平從此白婆得罪不見蹤由兩神策軍以其事漸乖必為大禍與諸王商議須急去除於重陽節向樞密院中排宴喚入謝恩却出宣化門供奉官似先知袖劔揮之諸王相次剗刃以為菹醢按

胡弘立即順節也新舊紀及諸書景福二年皆無此事蓋程匡柔傳聞之誤今日從實錄事則參取諸書從

者大譟而出

從才用翻

於是天威捧日登封三都大掠永寧

坊

三都皆神策五十四都之數

至暮乃定百官表賀

孫儒焚掠蘇

常引兵逼宣州錢鏐復遣兵據蘇州

蘇州自此為錢氏所有復扶又翻

儒屢敗楊行密之兵旌旗輜重亘百餘里

重直用翻

行密求

救於錢鏐鏐以兵食助之

以顧彥暉為東川節度使

遣中使宋道弼賜旌節楊守亮使楊守厚囚道弼奪旌

節發兵攻梓州癸卯彥暉求救於王建甲辰建遣其將

華洪李簡王宗侃王宗弼救東川

華戶化
翻姓也

建密謂諸將

曰爾等破賊彥暉必犒師汝曹於行營報宴因而執之

無煩再舉宗侃破守厚七砦

砦與寨同
音士賣翻

守厚走歸綿州

彥暉具犒禮諸將報宴宗弼以建謀告之彥暉乃以疾

辭初李茂貞養子繼臻據金州均州刺史馮行襲攻下

之

九域志均州西
至金州七百里

詔以行襲為昭信防禦使治金州

方鎮

表僖宗光啟元年置昭信防禦於金州

考異曰薛居

正五代史行襲破揚守亮兵詔升金州節鎮以戎昭為

軍額即以行襲為節度使按實錄光化元年正月始以

昭信防禦使馮行襲為昭信節度使新方鎮表光啟元

年升金商都防禦使為節度使是年罷節度置昭信軍
防禦使治金州光化元年始升昭信軍防禦使為節度
使天佑二年賜號楊守亮欲自金商襲京師行龍逆擊
戎昭軍薛史誤也

大破之 是歲賜涇原軍號曰彰義

考異曰新表在
乾寧元年今從實

錄增領渭武二州 福建觀察使陳巖疾病遣使以書

召泉州刺史王潮欲授以軍政未至而巖卒巖妻弟都

將范暉諷將士推己為留後

考異曰蔣文憚閩中實
錄云大順中巖薨十國紀

年在大順二年昭宗實錄在明年三月恐約奏到今從
閩中錄十國紀年又薛史閩中錄閩書皆云范暉巖婿
餘書皆云妻弟林仁志王氏啟運圖載監
軍程克論表云妻弟此最得實今從之

資治通鑑卷二百五十八

欽定四庫全書

資治通鑑卷二百五十九

宋 司馬光 撰

胡三省 音註

唐紀七十五

起玄默用敦盡周
遂攝提格凡三年

昭宗聖穆景文孝皇帝上之中

景福元年春正月丙寅赦天下改元

鳳翔李茂貞靜

難王行瑜

難乃
旦翻

鎮國韓建同州王行約秦州李茂莊五

節度使上言楊守亮容匿叛臣楊復恭

事見上卷上
年上時掌翻

請

出軍討之乞加茂貞山南西道招討使朝議以茂貞得

山南不可復制

復扶又翻

下詔和解之皆不聽

王鎔李匡

威合兵十餘萬攻堯山李克用遣其將李嗣勲擊之大

破幽鎮兵斬獲三萬

考異曰實錄在二月恐約奏到今從唐太祖紀年錄

楊

行密謂諸將曰孫儒之衆十倍於我吾戰數不利

數所角翻

欲退保銅官何如劉威李神福曰儒掃地遠來利在速

戰宜屯據險要堅壁清野以老其師時出輕騎抄其饋

餉

抄楚交翻

奪其浮掠彼前不得戰退無資糧可坐擒也戴

友規曰儒與我相持數年

僖宗光啓三年楊行密孫儒爭揚州至是五年矣

勝

負略相當今悉衆致死於我我若望風弃城正墮其計

淮南士民從公度江及自儒軍來降者甚衆公宜遣將

先護送歸淮南

降戶江翻將即亮翻

使復生業儒軍聞淮南安堵

皆有思歸之心人心既搖安得不敗行密悅從之

以孫儒驅

淮南人以攻楊行密故其謀云爾為行密擒孫儒張本

友規廬州人也威戎節

度使楊晟

僖宗文德元年置威戎軍於彭州

與楊守亮等約攻王建二

月丁丑晟出兵掠新繁漢州之境使其將呂莨將兵二

千會楊守厚攻梓州

范如招翻梓州東川節度使顧彥暉治所

建遣行營都

指揮使李簡擊羗斬之 戊寅朱全忠出兵擊朱瑄遣

其子友裕將兵前行軍於斗門

據舊書李師道傳斗門城在濮陽縣界

李茂貞王行瑜擅舉兵擊興元

不以天子之命舉兵故曰擅

茂貞表

求招討使不已遺杜讓能西門君遂書

遺唯季翻杜讓能時為相西門

君遂時為神策中尉此內外二大臣也

陵茂朝廷上意不能容御延英召

宰相諫官議之時宦官有陰與二鎮相表裏者宰相相

顧不敢言上不悅給事中牛徽曰先朝多難茂貞誠有

翼衛之功

此謂僖宗再幸山南時也難乃旦翻

諸楊阻兵亟出攻討其志

亦在疾惡但不當不俟詔命耳比聞兵過山南

比毗至翻

殺

傷至多陛下儻不以招討使授之使用國法約束則山

南之民盡矣上曰此言是也乃以茂貞為山南西道招

討使

牛徽之言上所以誘掖其君下所以彌縫悍將若以之為國謀則未也

甲申朱全

忠至衛南朱瑄將步騎萬人襲斗門朱友裕奔營走瑄

據其營全忠不知乙酉引兵趣斗門

趣七喻翻

至者皆為郾

人所殺全忠退軍瓠河

几域志濮州雷澤縣有瓠河鎮

丁亥瑄擊全忠

大破之全忠走張歸厚於後力戰全忠僅免

考異曰歸厚傳云

十一月誤也今從梁紀

副使李璠等皆死

璠音煩

朱全忠奏貶河

陽節度使趙克裕

考異曰實錄在正月末云全忠欲全義得河陽乃奏克裕有誣謗之言

而貶新紀云巳未朱全忠陷孟州遂河陽節度使趙克裕今從編遺錄

以佑國節度使張

全義兼河陽節度使

二鎮時皆屬朱全忠或貶或兼唯其所奏

孫儒圍宣

州初劉建鋒為孫儒守常州將兵從儒擊楊行密甘露

鎮使陳可言帥部兵千人據常州

潤州城東角土山上潤州城東角土山上有甘露寺前對北固

山後枕大江甯歷中李德裕建寺適有甘露降因以名之孫儒蓋因此寺而置甘露鎮也帥請曰率行密

將張訓引兵奄至城下可言倉猝出迎訓手刃殺之遂

取常州

考異曰新紀景福二年二月楊行密陷常州按行密自宣歸楊過常州已數張訓之功新紀

誤也今從十國紀年

行密別將又取潤州

楊行密自此遂有潤州而與錢氏爭常州矣

朱全忠連年攻時溥

光啓三年徐沐始交兵

徐泗濠三州民不

得耕獲兗鄆河東兵救之皆無功復值水災

復扶又翻

人死

者什六七溥困甚請和於全忠全忠曰必移鎮乃可溥

許之全忠乃奏請移溥他鎮仍命大臣鎮徐州詔以門

下侍郎同平章事劉崇望同平章事充感化節度使以

溥為太子太師溥恐全忠詐而殺之據城不奉詔崇望

及華陰而還

華戶化翻還從宣翻又如字

忠義節度使趙德諱薨

子匡凝代之

考異曰實錄此月以前忠義軍節度使趙匡凝起復某官不言德諱卒在何時新

傳薛史但云匡凝為唐州刺史兼七州馬步軍都校及德諱卒自為襄州留後朝廷即以旄鉞授之亦不言年

月今附於此

范暉驕侈失衆心

范暉據福州見上卷上年

王潮以從弟

彥復為都統弟審知為都監將兵攻福州

從才用翻監古銜翻

民

自請輸米餉軍平湖洞及濱海蠻夷皆以兵船助之

平湖

洞在泉州莆田縣界外九域志曰今興化軍大飛山地本平湖數頃一夕風雨暴至旦見此山聳峙一名大飛

辛丑王建遣族子嘉州刺史宗裕雅州刺史王宗侃

威信都指揮使華洪茂州刺史王宗瑤將兵五萬攻彭

州

按九域志彭州距成都九十餘里此其壤地相接煙火相望所謂卧榻之側豈容他人鼾睡者也王建安

得而不急攻之邪

楊晟逆戰而敗宗裕等圍之楊守亮遣其將

符昭救之徑趨成都營三學山

趨七喻翻漢州金堂縣東北十里有三學山

建亟召華洪還洪疾驅而至

王建一時諸將唯華洪饒智略建所倚也故亟召之

以禦符昭華戶化翻

後軍尚未集以數百人夜去昭營數里多擊

更鼓昭以為蜀軍大至引兵宵遁

更工衡翻更鼓持更之鼓官府及行軍每

更擊之以為節更鼓多則敵人以為營寨多故宵遁

三月以戶部尚書鄭延昌

為中書侍郎同平章事延昌從讜之從兄弟也

符宗乾

從讜鎮河東有聲績之從才用翻

左神策勇勝三都都指揮使楊子

實子遷子釗皆守亮之假子也

勇勝三都亦神策五十二都之數

自渠

州引兵救楊晟知守亮必敗壬子帥其眾二萬降於王

建

帥諱曰率

李克用王處存合兵攻王鎔癸丑拔天長鎮

天長鎮在潯沱河東北

戊午鎔與戰於新市大破之殺獲三萬餘

入

新市漢古縣唐併入鎮州九門縣

辛酉克用退屯樂城詔和解河東

及鎮定幽四鎮 楊晟遺楊守貞楊守忠楊守厚書于

季使攻東川以解彭州之圍守貞等從之神策督將竇

行實戍梓州守厚密誘之為內應誘音守厚至涪城行

實事泄顧彥暉斬之

考異曰實錄明年正月楊守厚攻東川以實行實為內應事泄行

實死守厚遁去因李茂貞與王建爭東川追叙今年事耳今從十國紀年守厚遁去守貞守

忠軍至無所歸盤桓綿劍閣

綿劍二州名宋白曰綿州漢涪城縣地西魏置潼州

隋置綿州以綿水為稱九域志綿州東北至劍州二百九十四里

王建遣其將吉諫襲

守厚破之癸亥西川將李簡邀擊守忠於鍾陽

九域志綿州巴

兩縣有鍾陽鎮

斬獲三千餘人夏四月簡又破守厚於銅鉞

鉞亡

侯翻

斬獲三千餘人降萬五千人守忠守厚皆走乙酉

置武勝軍於杭州以錢鏐為防禦使天威軍使賈德

晟以李順節之死頗怨憤

李順節死見上卷上年

西門君遂惡之

惡烏路翻

奏而殺之德晟麾下千餘騎奔鳳翔李茂貞由是

益彊李匡威出兵侵雲代壬寅李克用始引兵還

自鎮

州引還

時溥遣兵南侵至楚州楊行密將張訓李德誠

敗之于壽河

敗補遺翻下同

遂取楚州執其刺史劉瓚

朱全忠以劉瓚

刺楚州見二百五十七卷
唐宗光啓三年張訓等既破徐兵乘勝遂取汴之楚州
考異曰新紀三月乙巳楊

行密陷楚州執刺史劉璠十國紀年三月時溥遣兵三萬南段至楚州四月楊行密將張訓李德誠敗徐兵于壽河浮斬三千級取楚州執璠今從之
加邠寧節度使王行瑜兼中書令

楊行密屢敗孫儒兵破其廣德營

廣德營孫儒之兵營於廣德者也敗

補邁翻

張訓屯安吉斷其糧道

義寧二年沈法興分烏程置安吉縣唐因之屬湖州

九域志在州西南百七十一里斷音短

儒食盡士卒大疫遣其將劉建鋒

馬殷分兵掠諸縣六月行密聞儒疾瘡

瘡逆約翻疾而寒熱迭作謂之

瘡
戊寅縱兵擊之會大雨晦冥儒軍大敗安仁義破儒

五十餘寨田頔擒儒于陳

陳請曰陣

斬之傳首京師儒衆多

降於行密

光啓三年孫儒始與行密交兵至是而敗孫儒以十倍之衆攻行密其智勇亦無以大相

過而卒斃於行密者儒專務殺掠人心不附又後無根本行密雖為儒所困分遣張訓李德誠略淮浙之地以自廣又斥餘衆以飼饑民既得人心又有根本所以勝也

劉建鋒馬殷收餘衆七千

南走洪州

走音奏

推建鋒為帥殷為先鋒指揮使張佖為

謀主比至江西衆十餘萬

帥所類翻比必利翻及也

丁酉楊行密帥

衆歸揚州

帥讀曰率謂左右曰

常州大成也張訓以一剑下之不

亦壯哉葛紀大順二年三月淮南節度使孫儒為宣州觀察使楊行密所殺初行密揚州失守據宣州孫儒以

兵攻圍三年是春淮南大饑軍中疫癘是月孫儒亦病
為帳下所執降行密行密乃併孫儒之衆復據廣陵薛
居正五代史行密傳曰大順元年行密危感出據宣州
儒復入揚州二年儒攻行密屬江淮疾疫師人多死儒
亦卧病為部下所執送於行密殺之行密自宣城長驅
入于廣陵唐補紀大順二年六月孫儒兵敗于宛陵城
下楊行密進首級於西京吳錄曰景福元年六月六日
太祖盡率諸將晨出擊儒田顯臨陳擒儒以獻斬儒于
市傳首京師新紀實錄十國紀年
皆據此舊紀薛史唐補紀皆誤

秋七月丙辰至廣陵

表田頔守宣州安仁義守潤州先是揚州富庶甲天下

先悉
薦翻

時人稱揚一益二

言揚州居一
益州為次也

及經秦畢孫楊兵

火之餘

秦彥畢師鐸孫
儒楊行密也

江淮之間東西千里掃地盡矣

王建圍彭州久不下民皆竄匿山谷諸寨日出俘掠謂之淘虜都將先擇其善者餘則士卒分之以是為常

將即亮翻

有軍士王先成者新津人本書生也世亂為兵度

諸將惟北寨王宗侃最賢乃往說之曰

度徒洛翻說式萬翻

彭州

本西川之巡屬也陳田召楊晟割四州以授之

見二百五十七

卷文德元年陳田謂陳敬瑄田令孜

偽署觀察使與之共拒朝命

朝直達翻今

陳田已平而晟猶據之州民皆知西川乃其大府

巡屬諸州

以節度使府為大府亦謂之會府

而司徒乃其主也

時朝命以王建檢校司徒故稱之

故大軍始至民不入城而入山谷避之以俟招安今軍

至累月未聞招安之命軍士復從而掠之

復扶又翻

與盜賊

無異奪其貲財驅其畜產分其老弱婦女以為奴婢使
父子兄弟流離愁怨其在山中者暴露於暑雨殘傷於
蛇虎孤危饑渴無所歸訴彼始以楊晟非其主而不從
今司徒不加存恤彼更思楊氏矣宗侃惻然不覺屢移
其牀前問之先成曰又有甚於是者今諸寨每旦出六
七百人入山淘虜薄暮乃返

薄迫也

曾無守備之意賴城

中無人耳萬一有智者為之畫策

為手為翻

使乘虛奔突先

伏精兵千人於門內登城望洵虜者稍遠出弓弩手礮

手各百人

礮與砲同
匹貌翻

攻寨之一面隨以役卒五百負薪

土填壕為道然後出精兵奮擊且焚其寨又於三面城

下各出糴兵

糴兵者以糴敵
使不知所備

諸寨咸自備禦無暇相救

城中得以益兵繼出如此能無敗乎宗侃矍然曰

矍然曰
縛翻

此誠有之將若之何先成請條列為狀以白王建宗侃

即命先成草之大指言今所白之事須四面通共

時西
川兵

圍彭州四面下寨宗裕宗侃華洪宗瑤各當一面

宗侃所司止於北面或所白

可從乞以牙舉施行

牙舉謂從使牙檢舉而見之施行

事凡七條其一

乞招安山中百姓其二乞禁諸寨軍士及子弟無得一

人輒出淘虜仍表諸寨之旁七里內聽樵牧敢越表者

斬其三乞置招安寨中容數千人以處所招百姓

處呂呂翻

宗侃請選所部將校謹幹者為招安將使將三十人晝

夜執兵巡衛其四招安之事須委一人總領今榜帖既

下

下戶嫁翻

諸寨必各遣軍士上山招安百姓見之無不驚

疑如鼠見狸誰肯來者

狸捕鼠者也鼠見狸則知必死特恨不可得而走耳詎肯前就

之哉故以為諭

欲招之必有其術願降帖付宗侃專掌其事其

五乞嚴勒四寨指揮使悉索前日所虜彭州男女老幼

集於營場有父子兄弟夫婦自相認者即使相從牒具

人數部送招安寨有敢私匿一人者斬仍乞勒府中諸

營亦令嚴索

府謂成都府索山客翻

有自軍前先寄歸者量給資

糧

量音良

悉部送歸招安寨其六乞置九隴行縣於招安

寨中

彭州治九隴縣彭州未下故乞置行縣九隴故漢繁縣地後魏改曰九隴以州西有九隴山為名九

隴一伏隴二丘隴三秋隴四龍奔隴五走馬隴六駱馳隴七千秋隴八較車隴九橫擔隴以前南鄭

令王丕攝縣令

南鄭漢古縣唐帶興元府

設置曹局撫安百姓擇其

子弟之壯者給帖使自入山招其親戚彼知司徒嚴禁

侵掠前日為軍士所虜者皆獲安堵必歡呼踊躍相帥下

山

帥讀曰率

如子歸母不日盡出其七彭州土地宜麻

益州記彭

之地號小郾言土地肥良北之郾邑也

百姓未入山時多漚藏者

漚烏侯胡久清

也宜令縣令曉諭各歸田里出所漚麻鬻之以為資糧

必漸復業建得之大喜即行之悉如所申

考異曰張彭者舊傳云五

月二十日諸軍馬步兵士到彭州城下至七月初已經五十餘日諸軍兵士始到刈麥充糧至七月初麥盡並無顆粒兵士但託求食乃每日遠去入山虜劫逃避百姓有一軍士本是儒生乃往北面寨說于統帥云云十國紀年王先成謂王宗侃云云先成上招攜七事建皆納之先成蜀州新津人按十國紀年王建自二月辛丑遣王宗裕等擊楊晟遂圍彭州又晟遣楊守忠書云弊邑雖小固守三年矣而張彭云五月二十日方圍彭州或者先固之不克而再往賊彭但云有一軍士而十國紀年姓王名先成不知其本出何書也

明日榜

帖至威令赫然無敢犯者三日山中民競出赴招安寨如歸市寨不能容斥而廣之浸有市井又出麻鬻之民

見村落無抄暴之患

抄楚交翻

稍稍辭縣令復故業月餘招

安寨皆空 已巳李茂貞克鳳州感義節度使滿存奔

興元

僖宗光啓二年滿存得鳳州至是而敗奔興元就楊守亮

茂貞又取興洋二州

皆表其子弟鎮之

考異曰薛居正五代史茂貞傳曰大順二年楊復恭得罪奔山南與楊

守亮據興元叛茂貞與王行瑜討平之詔以徐彥若鎮興元茂貞違詔表其假子繼徽為留後堅請旄鉞昭宗不得已而授之自是茂貞始萌問鼎之志既而逐涇原節度使張球洋州節度使楊守忠鳳州刺史滿存皆奪據其地云大順二年誤也今從新紀 八月以楊行密為淮南節度使同

平章事以田頔知宣州留後安仁義為潤州刺史孫儒

降兵多蔡人

降戶江翻

行密選其尤勇健者五千人厚其稟

賜以阜衣蒙甲

稟筆錦翻給也阜才早翻

號黑雲都每戰使之先登

陷陳

陳讀曰陣

四鄰畏之行密以用度不足欲以茶鹽易民

布帛堂書記舒城高勛曰兵火之餘十室九空又漁利

以困之

記坊記諸侯不下漁色注曰象捕魚然中網取之是無所擇漁利之漁猶漁色之漁

將復

離叛

復扶又翻下同

不若悉我所有易鄰道所無足以給軍選

賢守令勸課農桑數年之間倉庫自實行密從之

守式又翻

正翻令力

田頌聞之曰賢者之言其利遠哉行密馳射武伎

皆非所長

茂渠綺翻

而寬簡有智略善撫御將士與同甘苦

推心待物無所猜忌嘗早出從者斲馬鞞取其金

從才用翻

斲音短鞞七由翻
史炤曰馬紂也

行密知而不問他日復早出如故人

服其度量淮南被兵六年

光啓三年畢師鐸亂淮南始被兵被皮義翻

士民

轉徙幾盡

幾居依翻
下幾復同

行密初至賜與將吏

將即亮翻

帛不過

數尺錢不過數百而能以勤儉足用非公宴未嘗舉樂

招撫流散輕徭薄斂

斂力瞻翻

未及數年公私富庶幾復承

平之舊

復還也讀如字

李克用北巡至天寧軍

代州西有天安軍天寶十

二載置

聞李匡威赫連鐸將兵八萬寇雲州遣其將李君

慶發兵於晉陽克用潛入新城伏兵於神堆

神堆在雲州城南新

城又在神堆東南神堆即神武川之黃花堆新城在其側蓋克用祖執宜保黃花堆時所築也按薛史唐紀李克用生於神武川之新城宋白曰雲州西南至神堆柵九十里

擒吐谷渾邏騎三百

邏郎

佐翻

匡威等大驚丙申君慶以大軍至克用遷入雲州丁

酉出擊匡威等大破之己亥匡威等燒營而遁追至天

成軍

蔚州東北有天成軍

斬獲不可勝計

勝音升

辛丑李茂貞攻

拔興元楊復恭楊守亮楊守信楊守貞楊守忠滿存奔

閬州

光啓三年楊守亮鎮興元至是而敗考異曰舊紀景福元年十一月辛丑鳳翔郾寧之衆攻興元

陷之節度使楊守亮前中尉楊復恭判官李巨川突圍而遁十二月辛未華州刺史韓建奏於乾元縣遇興元散兵擊敗之斬楊守亮楊復恭傳首實錄乾寧元年七月鳳翔郾寧之兵攻興元陷之楊守亮楊復恭突圍而遁新紀景福元年八月茂貞寇興元守亮滿存奔閬州乾寧元年七月茂貞陷閬州八月守亮伏誅新復恭傳景福元年茂貞攻興元破其城復恭守亮守信奔閬州十國紀年蜀史景福元年十月行瑜茂貞表守亮招納叛臣請討之感義節度使滿存救守亮為茂貞所敗奔興元十一月郾岐攻陷興元楊復恭帥守亮守貞守忠滿存同奔閬州十二月壬午華洪敗守亮等於州按實錄景福二年正月移茂貞山南於時守亮不應猶在山南今年月從新紀

茂貞表其子繼密權知興元府事

九月加荆南節度使成汭同平章事 時溥迫監軍奏

稱將士留已

是年二月召時溥為太子太師

冬十月復以溥為侍中感

化節度朱全忠奏請追溥新命詔諭解之 初邢沼磁

州留後李存孝與李存信俱為李克用假子不相睦存

信有寵於克用存孝在邢州欲立大功以勝之乃建議

取鎮冀

見上卷大順二年

存信從中沮之不時聽許及王鎔圍

堯山存孝救之不克克用以存信為蕃漢馬步都指揮

使與存孝共擊之二人互相猜忌逗留不進克用更遣

李嗣勳等擊破之

事見上是年正月

存信還譖存孝無心擊賊

疑與之有私約存孝聞之自以有功於克用而信任顧

不及存信

顧反也

憤怒且懼及禍乃潛結王鎔及朱全忠

上表以三州自歸於朝廷

考異實錄大順元年十月太原將邢州刺史李存孝自

晉州帥行營兵據邢州舊記十一月癸丑朔太原將邢州刺史李存孝自恃擒孫揆功合為昭義帥怨克用授康君立存孝自晉州帥行營兵歸邢州據城上表歸明仍致書與張濬王鎔求救援唐末見聞錄十月二十四日李存孝領兵打晉州遁歸邢州背叛與宰臣張濬狀曰某自主三郡已逾二年又曰常思安知建在此之日歸順朝廷之時四鄰不有保持一家俄受塗炭以此猶豫莫敢申明遂至去年遽絕鄰好宜是某之情願蓋因李某之指揮又曰自今春戰爭之後實願休罷戈鋌自九月十五日以來有李某之人使促令某南至進軍面

趙州牽脅李某即土門路入直屬鎮州今月十四日昭義軍人百姓等衆請某權知兵馬留後歸順朝廷大王聞存孝致逆大震雄威令下先差大將進軍連至邢州仍候指揮不得輒有闕敵但圍小壘專俟大軍據唐太祖紀年錄薛居正五代史紀傳實錄新紀皆云景福元年十月存孝叛太原歸朝廷而紀唐末見聞錄在大順元年十月舊紀恐是連言以後事按二年三月安知建方叛太原而此書中已說知建又云自主三郡已近二年存孝大順二年方為邢州磁節度至景福元年乃二年也然則實錄邢州刺史據邢州亦因舊記之誤見聞錄所載存孝書蓋與王鎔誤云與張濬也

乞賜旌節及會諸道兵討李克用

詔以存孝為邢州磁節度使不許會兵 十一月時溥

濠州刺史張璠泗州刺史張諫以州附于朱全忠

璠徐
醉翻

史言時溥巡屬皆附于汴溥謹保徐州

乙未朱全忠遣其子友裕將兵

十萬攻濮州拔之執其刺史邵倫

濮州朱瑄巡屬濮博木翻

遂令友

裕移兵擊時溥

孫儒將王壇陷婺州刺史蔣瓌奔越

州

中和四年蔣瓌據婺州

廬州刺史蔡儔發楊行密祖父墓

光啓

三年楊行密留蔡儔守廬州明年儔以州附孫儒儒既敗儔遂阻兵以拒行密

與舒州刺史倪

章連兵遣使送印於朱全忠以求救全忠惡其反覆

惡烏

路翻

納其印不救且牒報行密行密謝之行密遣行營都

指揮使李神福將兵討儔

宣明歷浸差

穆宗立以為累世繡緒必

更歷紀乃詔日官改撰歷術名曰宣明

太子少詹事邊岡造新歷成十二

月上之命曰景福崇玄歷

邊岡與司天少監胡秀林均州司馬王穉改治新歷然術

一出於岡岡用算巧能馳騁反覆於乘除間由是簡捷超徑等接之術興而經制遠大哀序之法廢矣雖籌策便易然皆冥於本原上時掌翻壬午王建遣其將華洪擊楊守亮於

閬州破之建遣節度押牙延陵鄭頊使於朱全忠

延陵漢曲

阿縣地晉分置延陵郡隋移治丹徒武德三年移於舊郡治屬潤州今丹楊縣之延陵鎮即其地

全忠

問劔閣頊極言其險全忠不信頊曰苟不以聞恐誤公

軍機全忠大笑

是歲明州刺史鍾文季卒其將黃晟

自稱刺史

路振九國志黃晟明州鄞縣人歷為將領會刺史鍾文季卒遂據其郡

二年春正月時溥遣兵攻宿州刺史郭言戰死

大順二年未全

忠取宿州事見上卷

東川留後顧彥暉既與王建有隙

大順二年楊守

亮攻東川王建遣兵救之欲因而取之不克由是與顧彥暉有隙事亦見上卷

李茂貞欲撫之

使從已奏請更賜彥暉節

大順二年朝廷遣中使賜顧彥暉節楊守厚邀而奪之故

請更詔以彥暉為東川節度使

中前命也

茂貞又奏遣知興

元府事李繼密救梓州

梓州未受兵而救之何也非救之也遣兵助彥暉以致西川之

師未幾建遣兵敗東川鳳翔之兵於利州

幾居宜翻敗補邁翻下同

彥暉求和請與茂貞絕乃許之鳳翔節度使李茂貞自請鎮興元詔以茂貞為山南西道兼武定節度使以中書侍郎同平章事徐彥若同平章事充鳳翔節度使

考

異曰舊紀在七月癸未今從實錄新紀

又割果閬二州隸武定軍茂貞欲

兼得鳳翔不奉詔二月甲戌加西川節度使王建同

平章事李克用引兵圍邢州王鎔遣牙將王藏海致

書解之克用怒斬藏海進兵擊鎔敗鎮兵於平山

平山漢蒲

吾縣隋為房山縣至德元年改為平山縣屬鎮州九域志在州西六十五里

辛巳攻天長鎮

旬日不下鎔出兵三萬救之克用逆戰於叱日嶺下大破之斬首萬餘級餘衆潰去河東軍無食脯其尸而咱

之

咱徒
濫翻

時溥求救於朱瑾朱全忠遣其將霍存將騎

兵三千軍曹州以備之瑾將兵二萬救徐州存引兵赴

之與朱友裕合擊徐兗兵於石佛山下大破之

石佛山
近彭城

薛史曰石佛山在彭門南述征記
彭城南有石佛山頂方二丈二尺

瑾遁歸兗州辛卯徐

兵復出存戰死

霍存恃勝而不虞徐兵之復
出故戰敗而死復扶又翻

李克用

進下井陘李存孝將兵救王鎔遂入鎮州與鎔計事鎔

又乞師於朱全忠全忠方與時溥相攻不能救但遣克

用書

遺唯李翻

言鄴下有十萬精兵抑而未進克用復書儻

實屯軍鄴下顓望降臨

顓魚容翻仰也

必欲真決雌雄願角逐於

常山之尾甲午李匡威引兵救鎔敗河東兵於元氏

補敗

邁翻

克用引還邢州鎔攜匡威於藁城輦金帛二十萬以

酬之朱友裕圍彭城時溥數出兵友裕閉壁不戰

去年

十一月朱全忠遣友裕攻彭城此言其積時相持之事數所角翻

朱瑾宵遁友裕不追

謂石佛山下戰時

都虞侯朱友恭以書譖友裕于全忠全忠怒

驛書下都指揮使龐師古

下戶妹翻

使代之將且按其事書

誤達於友裕友裕大懼以二千騎逃入山中

按薛史元貞張后傳

作二十騎朱友裕傳作數騎二千騎太多當以二十騎為是

潛詣碭山匿於伯父全

昱之所

朱全忠兄弟本居碭山全昱全忠長兄也碭音唐

全忠夫人張氏聞之

使友裕單騎詣汴州見全忠泣涕拜伏于庭全忠命左

右捽抑將斬之

捽者持其髻抑者按其頸捽昨沒翻

夫人趨就抱之泣曰

汝捨兵衆束身歸罪無異志明矣全忠悟而捨之使權

知許州友恭壽春人李彥威也幼為全忠家僮

考異曰薛居

正五代史高季興傳以友恭為汴之賈人李七郎十國紀年以為壽春賈人友恭傳云彥威北角事太祖今從

之全忠養以為子張夫人碭山人多智略全忠敬憚之

雖軍府事時與之謀議或將兵出中塗夫人以為不可

遣一介召之全忠立為之返

為于偽翻

龐師古攻佛山寨拔

之

佛山寨即石佛山寨

自是徐兵不敢出

李匡威之救王鎔也

將發幽州家人會別

家人悉會於使宅以送別

弟匡籌之妻美匡威

醉而淫之二月匡威自鎮州還至博野匡籌據軍府自

稱留後以符追行營兵匡威眾潰歸但與親近留深州

涿州在博野東南一百五十里進退無所之遣判官李抱真入奏請歸

京師京師屢更大亂

更工衛翻經也

聞匡威來坊市大恐曰金

頭王來圖社稷士民或竄匿山谷王鎔德其以已故致

失地

德其救已以致失幽州

迎歸鎮州為築第父事之

為于偽翻為李匡威

劫王鎔而死張本薛史曰鎔館匡威於寶壽佛寺

以渝州刺史柳玘為瀘州

刺史

九域志渝州西至瀘州七百六十里玘部田翻考異曰新傳云玘坐事貶瀘州刺史卒北夢瑣言

亦云謫授瀘州新舊書玘貶官無年月今據實錄此月玘自渝為瀘州刺史當是初貶渝州後移瀘州新傳北夢瑣言誤也柳氏自公綽以來世以孝悌禮法為士大夫所

宗

言自元和以來為名家

玘為御史大夫上欲以為相宦官惡之

惡鳥路翻

故久謫於外玘嘗戒其子弟曰凡門地高可畏不

可恃也立身行已一事有失則得罪重於他人死無以

見先人於地下此其所以可畏也門高則驕心易生族

盛則為人所嫉懿行實才人未之信

行下孟翻下同

小有玘類

玘疾移翻類盧對翻玉病曰玘絲節曰類

衆皆指之此其所以不可恃也故

膏梁子弟學宜加勤行宜加勵僅得比他人耳

使柳氏子姪常

能守玘之戒各務修飭雖至今為名家可也

王建屢請殺陳敬瑄田令孜

朝廷不許夏四月乙亥建使人告敬瑄謀作亂殺之新

津

陳敬瑄居新津見上卷大順二年

又告令致通鳳翔書下獄死

下遐稼翻

建使節度判官馮涓草表奏之曰開匣出虎孔宣父不

責他人當路斬蛇孫叔敖蓋非利已

論語孔子責冉有季路曰虎兕出於

柙是誰之過歟楚孫叔敖為嬰兒出遊而還憂而不食其母問其故泣而對曰今日吾見兩頭蛇恐去死無日矣母曰今蛇安在曰吾聞見兩頭蛇者死吾恐他人復見已埋之也母曰無憂汝不死吾聞之有陰德者天報以福人聞之皆諭其為仁也專殺不行於閭外先機恐失於穀中

古穀

候涓宿之孫也

馮宿事見二百四十五卷開成元年涓主淵翻

汴軍攻徐州

累月不克

自去年十一月攻徐州至是五月矣

通事官張濤以書白朱全

忠云進軍時日非良故無功全忠以為然敬翔曰今攻

城累月所費甚多徐人已困旦夕且下使將士聞此言

則懈於攻取矣全忠乃焚其書癸未全忠自將如徐州

戊子龐師古拔彭城時溥舉族登鷲子樓自焚死

唐宗中和

元年時溥據徐州至是而亡張建封之鎮徐也有愛妓

曰盼盼建封既歿張氏舊第有小樓名燕子盼盼念舊愛

而不嫁居是樓十餘年幽獨悵然出自樂天集 考異

曰實錄五月汴州奏拔徐州舊紀四月汴將王重師牛

存節陷徐州舊傳溥求援于兗州朱瑾出兵救之值大

雪糧盡而還汴將王重師牛存節夜乘梯而入溥與妻

子登樓自焚而卒景福二年也新紀四月戊子朱全忠陷徐州時溥死之薛居正五代史梁紀丁亥師古下彭門衆溥首以獻唐太祖紀年錄四月澤州李罕之上言懷孟降人報汴將龐師古於今月八日攻陷徐州徐師時溥衆族皆沒溫既下徐方詐請朝廷命帥昭宗乃以兵部尚書孫儲為徐帥既而溫以他詞斥去自以其將鎮之四月八日茲河東傳聞之誤今從編遺錄新紀

已丑全忠入彭城以宋州刺

史張廷範知感化留後奏乞朝廷除文臣為節度使

李匡威在鎮州為王鎔完城塹繕甲兵視之如子匡威

以鎔年少且樂真定土風

為于偽翻下為之同鎮州漢之真定國也樂音洛

潛

謀奪之李抱真自京師還為之畫策陰以恩施悅其將

士

施式政翻

王氏在鎮久鎮人愛之不徇匡威匡威忌日鎔

就第弔之

父母終之日子以為忌日第者李匡威寓第也

匡威素服衷甲伏兵

劫之鎔趨抱匡威曰鎔為晉人所困幾亡矣

晉人謂河東李克用

之兵幾居依翻

賴公以有今日公欲得四州此固鎔之願也

鎮

深趙四州

不若與公共歸府以位讓公則將士莫之拒矣匡

威以為然與鎔駢馬

駢馬並馬也

陳兵入府會大風雷雨屋

瓦皆震匡威入東偏門

此鎮州牙城之東偏門也

鎮之親軍閉之

既入

門而為鎮兵所閉絕其繼至者

有屠者墨君和自缺垣躍出拳毆匡威

甲士歐鳥口翻挾鎔於馬上負之登屋鎮人既得鎔攻匡威

殺之并其族黨

考異曰實錄殺匡威在五月恐約奏到舊紀六月乙卯幽州李匡威謀害王

鎔恒州三軍攻匡威殺之舊傳唐太祖紀年錄皆云五月新紀四月丁亥按匡籌奏云四月十九日是月已巳朔十九日丁亥也今從之鎔時年十七體疎瘦為君和所挾頸痛頭

偏者累日李匡籌奏鎔殺其兄請舉兵復冤詔不許

幽州將劉仁恭將兵戍蔚州過期未代士卒思歸會李

匡籌立戍卒奉仁恭為帥還攻幽州

蔚紆勿翻帥所類翻至居庸

關為府兵所敗

府兵幽州節度使府之兵也敗補遺翻

仁恭奔河東李克

用厚待之

為李克用取
幽州張本

李神福圍廬州甲午楊行密

自將詣廬州田頌自宣州引兵會之初蔡人張顥以驍

勇事秦宗權後從孫儒儒敗歸行密行密厚待之使將

兵戍廬州蔡儔叛顥更為之用及圍急顥踰城來降

降戶

江翻

行密以隸銀槍都使袁稹

使疏吏翻
稹止忍翻

稹以顥反覆白

行密請殺之行密恐稹不能容置之親軍

為張顥殺
楊渥張本

稹

陳州人也

稹止
忍翻

王彥復王審知攻福州久不下

去年
二月

王湖遣彥復
等攻福州

范暉求救於威勝節度使董昌

僖宗中和
三年升浙

東觀察為義勝節度光
啓三年改為威勝節度

昌與陳巖昏姻發溫台婺州兵

五千救之彥復審知以城堅援兵且至士卒死傷多白

王潮欲罷兵更圖後舉潮不許請潮自臨行營潮報曰

兵盡漆兵將盡漆將兵將俱盡吾當自來

將即亮翻

彥復審

知懼親犯矢石急攻之五月城中食盡暉知不能守夜

以印授監軍弃城走援兵亦還庚子彥復等入城辛丑

暉亡抵汭海都為將士所殺

文德二年范暉據福州

潮入福州自

稱留後素服葬陳巖以女妻其子延晦厚撫其家

妻七細翻

汀建二州降嶺海間羣盜二十餘輩皆降潰

言羣盜或降或潰也

王氏自此遂據有七閩矣降戶江翻

閏月以武勝防禦使錢鏐為蘇杭

觀察使

錢鏐以杭升蘇因以命之

又以扈蹕都頭曹誠為黔中節度

使耀德都頭李鋌為鎮海軍節度使宣威都頭孫惟晟

為荆南節度使

耀德宣威皆神策五十四都之數黔渠今翻鋌音蟬

六月以捧日

都頭陳珣為嶺南東道節度使並同平章事時李茂貞跋

扈上以武臣難制欲用諸王代之故誠等四人皆加恩

解兵柄令赴鎮

後四人不聞至鎮蓋各有分據者四人不得而赴也考異曰舊紀三月庚子

以陳珣為嶺南東道節度使曹誠為黔中節度使李鉉為鎮海節度使孫惟晟為荆南節度使時朝議以茂貞傲海王命武臣難制故罷五將之權今從實錄止是四將

李匡籌出兵攻王鎔之

樂壽武強以報殺匡威之恥

秋七月王鎔遣兵救邢

州李克用敗之於平山

敗補邁翻

士申進擊鎮州鎔懼請以

兵糧二十萬助攻邢州克用許之克用治兵于樂城合

鎔兵三萬進屯任縣

任漢古縣中廢唐之任漢南樂縣地武德四年置任縣治范鄉城在

邢州東南治直之翻

李存信屯琉璃陂

琉璃陂在邢州龍岡縣界

丁亥楊行

密克廬州斬蔡傳左右請發傳父母冢行密曰傳以此

得罪吾何為效之

蔡傳發行密祖父家見上年

加天雄節度使李

茂莊同平章事

時以秦州為天雄軍

錢鏐發民夫二十萬及十

三都軍士築杭州羅城周七十里

錢鏐以八都兵起後其衆日盛置十三都

今杭州羅城

昇州刺史張雄卒

考異曰新紀八月庚子蓋約奏到之日

今從十國紀年

馮弘鐸代之為刺史

李茂貞恃功驕橫上表

及遺杜讓能書

橫戶孟翻上時掌翻遺唯季翻

辭語不遜上怒欲討之

茂貞又上表略曰陛下貴為萬乘不能庇元舅之一身

元舅謂王環事見上卷大順二年

尊極九州不能戮復恭之一豎又曰

今朝廷但觀彊弱不計是非又曰約衰殘而行法隨盛

壯以加恩

李茂貞之表辭固慢然當時之政事實亦如此

體物錙銖

言體物有錙銖之重

則待之亦重有錙銖之輕則待之亦輕

看人衡續

劉峻廣絕交論曰衡所以揣其輕重續所以屬

其鼻息注云謂操衡揣勢之輕重持續量氣之粗細

又曰軍情易變戎馬難羈唯

慮旬服生靈因茲受禍

古之王者幾方千里以為旬服

未審乘輿播越

自此何之

乘繩證翻

上益怒決討茂貞命杜讓能專掌其事

讓能諫曰陛下初臨大寶國步未夷茂貞近在國門

按九

城志鳳翔東距長安二百八十里耳

臣愚以為未宜與之構怨萬一不克

悔之無及上曰王室日卑號令不出國門此乃志士憤

痛之秋藥弗瞑眩厥疾弗瘳

書說命之辭注云如服藥必瞑眩極其病乃除瞑莫

通翻眩玄通翻
瞑眩困極也

朕不能甘心為孱懦之主

孱懦山翻

惛惛度

日

惛於禽翻惛
情深靜貌

坐視陵夷卿但為朕調兵食

為于偽翻
調徒釣翻

朕自委諸王用兵成敗不以責卿讓能曰陛下必欲行

之則中外大臣共宜協力以成聖志不當獨以任臣上

曰卿位居元輔

杜讓能時
為首相

與朕同休戚無宜避事讓能

泣曰臣豈敢避事況陛下所欲行者憲宗之志也顧時

有所未可勢有所不能耳但恐他日臣徒受晁錯之誅

不能弭七國之禍也

晁錯事見漢景帝紀

敢不奉詔以死繼之

杜讓

能固已知必死矣

上乃命讓能留中書計畫調度月餘不歸

不歸

私第也調徒弔翻

崔昭緯陰結邠岐為之耳目讓能朝發一言

二鎮夕必知之李茂貞使其黨糾合市人數百千人擁

觀軍容使西門君遂馬訴曰岐帥無罪

岐帥謂李茂貞鳳翔本岐州帥

所類翻

不宜致討使百姓塗炭君遂曰此宰相事非吾所

及市人又邀崔昭緯鄭延昌肩輿訴之

舊制朝臣入朝皆乘馬宋建炎

指達以揚州街路滑始許朝士乘擔子觀此則唐末宰相亦有乘肩輿者矣

二相曰茲事主

上專委杜太尉吾曹不預知市人因亂投瓦石二相下

輿走匿民家僅自免喪堂印及朝服上命捕其唱帥者

誅之

喪息浪翻朝直達翻下同帥讀曰率

用兵之意益堅京師民或亡匿山

谷嚴刑所不能禁八月以嗣覃王嗣周為京西招討使

考異曰

按順宗子經封鄭王嗣周當是其後會昌後避武宗諱改鄭作覃按武宗諱漣後改諱炎如考異所云蓋避

鄭字旁從炎字也

神策大將軍李鐵副之

鐵火外翻

丙辰楊行密

遣田頔將宣州兵二萬攻歙州歙州刺史裴樞城守久

不下

歙書
涉翻

時諸將為刺史者多貪暴獨池州團練使陶

雅寬厚得民歙人曰得陶雅為刺史請聽命行密即以

雅為歙州刺史歙人納之雅盡禮見樞送之還朝樞導

慶之曾孫也

裴遵慶見二百二十
二卷肅宗上元二年

朱全忠命龐師古

移兵攻兗州與朱瑾戰屢破之九月丁卯以錢鏐為

鎮海節度使

升杭州武勝防禦使為鎮海節度使唐本
置鎮海軍於潤州今以命錢鏐於杭州至

光化元年鏐遂請徙軍於杭州

考異曰今年五月以

李鉉為鎮海節度使令赴鎮今復除鏐者按是時安仁

義已據潤州又孫惟晟除荆南時成汭已據荆南二人
安得赴鎮蓋但欲罷其軍權其實不至鎮而返耳實錄

云仍徙鎮海軍額于杭州按吳越備史是歲鏐初除鎮海節度使猶領潤州刺史至光化元年始移鎮海軍于

杭州實錄誤也
李存孝夜犯李存信營虜奉誠軍使孫考老

李克用自引兵攻邢州掘塹築壘環之
環音存孝時出

兵突擊塹壘不能成河東牙將袁奉韜密使人謂存孝

曰大王惟俟塹成即歸晉陽尚書所憚者獨大王耳
李克

用時封隴西郡王存諸將非尚書敵也大王若歸咫尺之
考蓋亦檢校尚書

塹安能沮尚書之鋒銳邪存孝以為然按兵不出旬日

塹壘成飛走不能越存孝由是遂窮汴將鄧季筠從克

用攻邢州輕騎逃歸

鄧季筠被擒見上卷大順元年

朱全忠大喜使將

親軍

將即亮翻

乙亥覃王嗣周帥禁軍三萬送鳳翔節度

使徐彥若赴鎮軍於興平

帥請曰率王率扈駕五十四軍進攻岐

考異曰舊紀覃

陽今從實錄

李茂貞王行瑜合兵近六萬軍于盤屋以拒之

近其新翻

禁軍皆新募市井少年茂貞行瑜所將皆邊兵百

戰之餘壬午茂貞等進逼興平禁軍皆望風逃潰茂貞

等乘勝進攻三橋京城大震士民奔散市人復守闕請

誅首議用兵者

復扶又翻

崔昭緯心害太尉門下侍郎同平

章事杜讓能密遺茂貞書曰用兵非主上意皆出於杜

太尉耳

遺于季翻

甲中茂貞陳於臨皋驛

臨皋驛在長安城西

表讓能

罪請誅之讓能言於上曰臣固先言之矣請以臣為解

言歸罪於讓能以解兵也

上涕下不自禁

禁居吟翻

曰與卿訣矣是日貶

讓能梧州刺史

梧州去京師五百里宋白曰漢武帝置蒼梧郡理廣信縣隋置蒼梧郡理

蒼梧縣唐為梧州

制辭略曰弃卿士之臧謀構藩垣之深釁咨

詢之際證執彌堅又流觀軍容使西門君遂于儋州內

樞密使李周潼于崖州段詡于驩州乙酉上御安福門

斬君遂周潼詔再貶讓能雷州司戶遣使謂茂貞曰惑
朕舉兵者三人也非讓能之罪以內侍駱全瓘劉景宣
為左右軍中尉壬辰以東都留守韋昭度為司徒門下
侍郎同平章事御史中丞崔胤為戶部侍郎同平章事
胤慎由之子也

胤慎由歷事文武
宣大中間為相

外寬弘而內巧險與

崔昭緯深相結故得為相季父安潛謂所親曰吾父兄

刻苦以立門戶終為緇郎所壞

壞音佳 考異曰舊傳
胤初拜平章事安潛有

此言按安潛去年卒
必先時嘗有此言也緇郎胤小字也李茂貞勒兵不解

請誅杜讓能然後還鎮崔昭緯復從而擠之

復扶又翻下同擠賤

西翻又子細翻

冬十月賜讓能及其弟戶部侍郎弘徽自盡

考

異曰續實運錄曰大順二年相國杜讓能孔緯值上京坊坊皆滿兼近藩連帥要行征討便自統軍至如岐陽李茂貞先朝封為太子本姓宋洋州牧先祖討昭義劉從諫有功子孫爵賞不絕洎壽王登位後遣禮部侍郎薛廷珪持璽書具禮冊為岐王茂貞先中和年中投判軍容使田令孜作養男姓田名彥賓蓋趨其勢也汴州朱溫先朝冊東平王至今上又遣薛廷珪為禮儀使延王為冊命使封為梁王且岐王與北司人情方洽宰相甚不和睦累表章云臣今駐旆咸陽未敢入中書問罪杜讓能等請寘極法表奏上不悅遂詔孔杜二相國令往咸陽謝及見岐王戰不能言岐王大怒却令歸中書

省過纔到中書上又發遣令祈謝岐王如是往來三度
岐王又奏曰二相見臣並不措一言如此曠官有辱聖
代請行朝典別選英賢上不樂敕罷知政事不得已除
昭緯荆南節度杜讓能除河中節度三日後貶于嶺表
出國門三十里並賜自盡時岐王率驍果五千人
住咸陽及貶二相乃退此皆誤謬之說今從實錄復下
詔布告中外稱讓能舉枉錯直

用論語孔子之言謂枉者舉之直者錯而不用

也哀亂之朝安有公是非邪錯干故翻

愛憎繫于一時鬻獄賣官聚斂踰

于巨萬

斂力贍翻

自是朝廷動息皆稟於邠岐南北司徒往

依附二鎮以邀恩澤有崔鉦王超者

鉦音蟬

為二鎮判官

凡天子有所可否其不逞者輒訴於鉦超二人則教茂

貞行瑜上章論之朝廷少有依違其辭語已不遜制復以茂貞為鳳翔節度使兼山南西道節度使守中書令

於是茂貞盡有鳳翔興元洋隴秦等十五州之地

鳳翔本一

鎮興元山南西道又一鎮洋州武定軍又一鎮秦隴天雄軍又一鎮史言李茂貞兼有四鎮之地

以徐

彥若為御史大夫 戊戌以泉州刺史王潮為福建觀

察使 舒州刺史倪章弃城走

倪章與蔡傳連兵傳已敗故章走

楊行

密以李神福為舒州刺史 邠寧節度使守侍中兼中

書令王行瑜求為尚書令韋昭度密奏太宗以尚書令

執政遂登大位自是不以授人臣惟郭子儀以大功拜尚書令終身避讓行瑜安可輕議十一月以行瑜為太師賜號尚父仍賜鐵券十二月朱全忠請徙鹽鐵於汴州以便供軍崔昭緯以為全忠新破徐鄆兵力倍增若更判鹽鐵不可復制

復扶又翻

乃賜詔開諭之汴將葛

從周攻齊州刺史朱威朱瑄朱瑾引兵救之

按方鎮表齊州時屬

平盧節度以後乾寧三年朱瓊降汴之事觀之則齊州已為兗鄆所并矣考異曰編遺錄云十月乙未今從

薛居正五代史梁紀

初武安節度使周岳殺閔勗據潭州

見二百五

十六卷僖宗
光啓二年

邵州刺史鄧處訥聞而哭之諸將入弔處

訥曰吾與公等咸受僕射大恩

閔勗檢校尚書右僕射欽化節度使以處訥刺

邵州故言受恩路振九國志鄧處訥自唐乾符中從閔勗征蠻于安南勗帥潭署處訥邵州兵馬留後處昌呂

翻

今周岳無狀殺之吾欲與公等竭一州之力為僕射

報仇可乎

為于偽翻

皆曰善於是訓卒厲兵八年乃結朗州

刺史雷滿

雷滿與周岳有爭肉之仇

共攻潭州克之斬岳自稱留後

鄧處訥甫得潭州而劉建鋒馬殷已擬其後矣

乾寧元年春正月乙丑朔赦天下改元 李茂貞入朝

大陳兵自衛數日歸鎮 以李匡籌為盧龍節度使

二月朱全忠自將擊朱瑄軍于魚山

魚山在鄆州須昌東阿兩縣之間

瑄與朱瑾合兵攻之兗鄆兵大敗死者萬餘人 以右

散騎常侍鄭綮為禮部侍郎同平章事

綮康禮翻 吳曰舊傳云光

化初為相恐誤北夢瑄言曰綮雖有詩名本無廊廟之望嘗典廬州吳王楊行密為本州步奏官因有遺闕而咎責之然其儒懦清慎弘農常重之昭宗時吳王雄據淮海朝廷務行姑息因盛言鄭公之德由是登庸中外驚駭太原兵至渭北天子震恐渴於攘却相國奏對請於文宣王諡號中加一哲字其不究時病率此類也按明年李克用舉兵至渭北 綮好談諧 好呼 多為歌後詩 綮已罷相今從實錄新紀

譏嘲時事

歇後者叙所以為詩而歇後語不發

上以為有所蘊手注班簿

命以為相

班簿注在朝者姓名

聞者大驚堂吏往告之蔡笑曰諸

君大誤使天下更無人未至鄭蔡吏曰特出聖意蔡曰

果如是奈人笑何既而賀客至蔡搔首言曰歇後鄭五

作宰相

鄭蔡第五為歇後詩時謂之歇後鄭五體

時事可知矣累讓不獲乃

視事

以邵州刺史鄧處訥為武安節度使

彰義節

度使張鈞薨表其兄鐫為留後

時以涇州為彰義節度鐫甫哀翻

三

月黃州刺史吳討舉州降楊行密

黃州時隸鄂岳武昌軍也按新書杜

洪傳吳討鄂州永興縣民以土團帥起據黃州

邢州城中食盡甲申李存孝

登城謂李克用曰兒蒙王恩得富貴苟非困于讒慝安

肯捨父子而從仇讎乎願一見王死不恨克用使劉夫

人視之夫人引存孝出見克用存孝泥首謝罪曰兒粗

立微勞存信逼兒失圖至此

粗坐五翻

克用叱之曰汝遺朱

全忠王銘書毀我萬端

遺唯季翻

亦存信教汝乎囚之歸于

晉陽車裂於牙門

考異曰太祖紀年錄先獲汴將鄧筠安康八軍吏劉蘄子潞州所得供

奉官韓歸範皆與存孝連坐同日誅之騎將薛阿檀懼自刺按舊紀克用擒歸範尋遣歸因附表訴冤不聞復

往晉陽也薛居正五代史鄧季筠傳後復自邢州逃歸
汴紀年錄誤也存孝傳曰武皇出井陘將逼真定存孝
面見王鎔陳軍機武皇暴怒誅先獲汴將安康八耳

常將騎兵為先鋒所向無敵身被重鎧腰弓髀槩獨舞

鐵撾陷陳萬人辟易

被皮義翻重直龍翻撾步爪翻陳
讀曰陣下同辟讀曰闢易如字

每以二馬自隨馬稍乏

言馬稍疲而乏力也

就陳中易之出入如

飛克用惜其才意臨刑諸將必為之請

為于偽翻下同

因而釋

之既而諸將疾其能竟無一人言者既死克用為之不

視事者旬日私恨諸將而於李存信竟無所謹又有薛

阿檀者其勇與存孝相侔諸將疾之常不得志密與存孝通存孝誅恐事泄遂自殺自是克用兵勢浸弱而朱

全忠獨盛矣

史言克用自翦羽翼故不競于汴

克用表馬師素為邢洺

節度使朱全忠遣軍將張從晦慰撫壽州從晦陵海

刺史江彥溫而與諸將夜飲彥溫疑其謀已明日盡殺

在席諸將以書謝全忠而自殺軍中推其子從頊知軍

州事全忠為之腰斬從晦五月加鎮海節度使錢鏐

同平章事劉建鋒馬殷引兵至澧陵

澧當作醴醴陵在漢臨湘縣界

後漢分為醴陵縣隋廢武德四年分長沙置醴陵縣屬潭州九域志在州東一百六十里

邵州指揮使蔣勛鄧繼崇將步騎三千守龍回關殷先

至關下遣使詣勛勛等以牛酒犒師殷使說勛曰劉驤

智勇兼人

觀後姚彦章說馬殷曰公與劉龍驤一體之人此必逸龍字說式萬翻

術家言

當興翼軫間

翼軫楚荊州分長沙入軫十六度

今將十萬衆精銳無敵

而君以鄉兵數千拒之難矣

按新書蔣勛鄧繼崇皆邵州土豪所領之兵皆其土

人故謂之鄉兵

不如先下之取富貴還鄉里不亦善乎勛等然

之謂衆曰東軍許吾屬還

劉建鋒等兵從東來故蔣勛等謂之東兵

士卒皆

惟呼弃旗幟鎧仗遁去建鋒令前鋒衣其甲張其旗趨

潭州

衣於既翻
趨七喻翻

潭人以為邵州兵還不為備建鋒徑入

府處訥方宴擒斬之戊辰建鋒入潭州自稱留後王

建攻彭州城中人相食彭州内外都指揮使趙章出降

降戶
江翻

王先成請築龍尾道屬於女牆

自城外築塹道陟
陀而上屬於城上

短垣其道前高後卑後塌于地若龍之垂尾然故謂
之龍尾道屬之欲翻女牆即城上短垣所謂陴也丙

子西川兵登城楊晟猶帥衆力戰即請
曰率刀子都虞侯王

茂權斬之

文德元年楊晟得彭州王建攻
彭州踰雨碁而後克亦憊矣

獲彭州馬步

使安師建建欲使為將師建泣謝曰師建誓與楊司徒

同生死不忍復戴日月

復扶又翻

惟速死為惠再三諭之不

從乃殺之禮葬而祭之更趙章姓名王宗勉王茂權曰

宗訓又更王釗名曰宗謹李綰姓名曰王宗綰

更工衡翻

辛卯中書侍郎同平章事鄭延昌罷為右僕射朱瑄

朱瑾求救於河東李克用遣騎將安福順及弟福慶福

遷督精騎五百假道於魏度河應之武昌節度使杜

洪攻黃州

以吳討叛附楊行密也

楊行密遣行營都指揮使朱延

壽等救之 六月甲午以宋州刺史張廷範為武寧節

度使從朱全忠之請也

徐州先時改感化軍既屬朱全忠復為武寧軍

蘄州

刺史馮敬章邀擊淮南軍朱延壽攻蘄州不克

蘄州武昌巡屬

也

戊午以翰林學士承旨禮部尚書李谿同平章事

方宣制水部郎中知制誥劉崇魯出班掠麻慟哭

強奪取之

為掠

上名崇魯問其故對言谿姦邪依附楊復恭西門君

遂得在翰林無相業恐危社稷谿竟罷為太子少傅谿

鄜之孫也

李鄜見憲宗紀

上師谿為文崔昭緯恐谿為相分已

權故使崇魯沮之谿十表自訟醜詆崇魯父符受賊枉法

事覺自殺弟崇望與楊復恭深交崇魯庭拜田令孜為

朱孜作勸進表

為于偽翻

乃云臣交結內臣何異挹賊唱賊

且故事純巾慘帶不入禁庭

純巾絹巾也慘淺色純式支翻

臣果不才

崇魯自應上章論列

上時掌翻上下表同

宜於正殿慟哭

宜下有宜字或

當字文意乃明

為國不祥無人臣禮乞正其罪詔停崇魯見任

見賢通翻

谿猶上表不已乞行誅竄表數千言詬詈無所不

至

話古候翻又許候翻劉崇魯固可罪李谿亦褊矣當是時強藩遙制朝廷視當朝宰相特鬼朴耳李谿急

於作相將以何為此其
所以有都亭驛之禍也

李克用大破吐谷渾殺赫連

鐸擒白義誠

執赫連鐸以薛志勤守雲中按唐太祖紀

年錄莊宗列傳薛居正五代史武皇紀皆云大順二年
武皇拔雲州鐸奔吐谷渾誤也新紀六月赫連鐸與李
克用戰于雲州死之太祖紀年錄十月討李匡籌師次
新城邊兵願從者衆赫連鐸白義誠數敗至是窮蹙無
歸自繁滕行詣於軍門太祖微數其罪命笞而脫之薛
史武皇紀吐谷渾傳亦云鐸等來歸命笞而釋之薛志
勤傳云王暉據雲州討平之以志勤為大同防禦使
與舊紀異唐末見聞錄六月收雲州處置赫連鐸活擒
白義誠進兵幽州界巡檢
迴府新紀蓋據此今從之

秋七月李茂貞遣兵攻閬

州拔之楊復恭楊守亮楊守信帥其族黨犯圍走

楊復恭等

奔閬州見上景福元年帥讀曰率

禮部侍郎同平章事鄭榮自以不

合衆望累表避位詔以太子少保致仕以御史大夫徐

彥若為中書侍郎兼吏部尚書同平章事 綿州刺史

楊守厚卒其將常再榮舉城降王建 楊復恭守亮守

信將自商山奔河東至乾元

萬歲通天元年份商州豐陽置安業縣乾元元年史

名乾元縣屬商州

遇華州兵獲之八月韓建獻于闕下斬于獨

柳

復恭父子至是夷矣

李茂貞獻復恭遺守亮書訴致仕之由

遺

季翻楊復恭致仕見上卷大順二年

云承天門乃隋家舊業

承天門長安太極宮南門

隋文帝使宇文愷所營本名昭陽門唐改曰承天門故復恭云然

大姪但積粟訓兵勿

貢獻

守亮復光養子故呼為姪

吾於荆榛中立壽王

上本封壽王

纔得尊

位廢定策國老有如此負心門生天子

昭義節度使

康君立詣晉陽謁李克用已未克用會諸將飲博酒酣

克用語及李存孝流涕不已君立素與李存信善一言

忤旨克用拔劍斫之囚於馬步司

唐末諸鎮皆於馬步司置獄今謂之兵馬

司忤五

九月庚申朔出之君立已死

五代史李存孝既

死武皇深惜之怒諸將無解慍者君立以一言忤旨武皇賜酖而殂唐末見聞錄曰八月三十日相公於左街

宅夜飲行劔斫損昭義節度使康君立把送馬步司水禁至九月一日放出尋已身薨薛史賜酖恐是文飾其

事克用表雲州刺史薛志誠為昭義留後冬十月封

皇子昶為棣王禊為虔王

昶兄羽翻
禊胡計翻

禊為沂王禕為遂

王劉仁恭數因蓋寓獻策於李克用

數所角翻下
同蓋古盍翻

願

得兵萬人取幽州克用方攻邢州分兵數千欲納仁恭

于幽州不克

此言是年十一月以前事

李匡籌益驕數侵河東之境

數所角翻

克用怒十一月大舉兵攻匡籌拔武州進圍新州

新州領永興碧山懷安龍門四縣史失其建置之始其地在端州西北考異曰唐太祖紀年錄十一月壬辰

大軍拔截寇進收楊門九子戍戍下武州甲寅攻新州
營于西北隅按十一月己未朔無壬辰戌戌甲寅紀年
錄誤今從實錄 以涇原留後張鐄為彰義節度使 朱全忠

遣使至泗州陵慢刺史張諫諫舉州降楊行密

泗州本徐州

屬自此遂為楊行密所有

行密遣押牙唐令回持茶萬餘斤如汴宋

貿易

留音茂

全忠執令回盡取其茶楊汴始有隙

為全忠攻行密

張本

十二月李匡籌遣大將將步騎數萬救新州李克

用選精兵逆戰於段莊大破之

段莊在新州東南

斬首萬餘級

生擒將校三百人以練紆之

紆充夜翻

徇于城下是夕新州

降辛亥進攻媯州

宋白曰媯州東南至幽州二百八十里西南至蔚州二百四十里媯居為

翻

壬子匡籌復發兵出居庸關

復扶又翻下同

克用使精騎當

其前以疲之遣步將李存審自他道出其背夾擊之幽

州兵大敗殺獲萬計甲寅李匡籌挈其族奔滄州義昌

節度使盧彥威利其輜重妓妾遣兵攻之于景城殺之

盡俘其衆

重直用翻唐宗光啓元年李全忠得幽州三世十年而滅景城漢成平縣唐屬滄州宋廢

為鎮屬瀛州樂壽縣九域志樂壽在瀛州南六十里宋白曰幽州東南至滄州五百五十里妓渠綺翻

考異

曰唐太祖紀年作匡恃今從新舊紀傳竇錄

存審本姓苻宛丘人克用養以

為子

薛史符存審初從李罕之罕之為諸葛爽所逼出保懷州部下分散存審乃歸李克用

丙辰

克用進軍幽州其大將請降匡籌素暗懦初據軍府兄

匡威聞之謂諸將曰兄失弟得不出吾家亦復何恨但

惜匡籌才短不能保守得及二年幸矣

景福二年匡籌得幽州至是僅

及二年

加匡國節度使王行約檢校侍中

吳討畏杜

洪之逼

杜洪攻吳討見上五月

納印請代于楊行密行密以先鋒

指揮使瞿章權知黃州

為瞿章為汴兵攻執張本

是歲黃連洞蠻

二萬圍汀州

黃連洞在汀州寧化縣南今潭飛磔即其地

福建觀察使王潮

遣其將李承勲將萬人擊之蠻解去承勲追擊之至漿

水口破之閩地略定潮遣僚佐巡州縣勸農桑定租稅

交好鄰道

好呼到翻

保境息民閩人安之

封州刺史劉謙

卒子隱居喪于賀江

賀水源出賀州富川縣石龍亘州城合桂嶺水謂之賀江

土民

百餘人謀亂隱一夕盡誅之嶺南節度使劉崇龜召補

右都押牙兼賀水鎮使未幾表為封州刺史

劉隱始此

義勝

節度使董昌苛虐

詳考下卷浙東乃威勝節度又按新書方鎮表廣明三年升浙東道

觀察為義勝軍節度光啓三年改威勝軍威勝為是

於常賦之外加歛數倍以充

貢獻及中外饋遺

飲力膳翻
遺唯季翻

每旬發一網金萬兩銀五

千鉞越綾萬五千匹他物稱是

稱尺證翻
適相等也

用卒五百人

或遇雨雪風水違程則皆死

唐制陸行之程馬日七十
里步及驢五十里車三十

里水行之程舟之重者泝河日三十里江四十里餘水
四十里空舟泝河四十里江五十里餘水六十里
流之舟則輕重同制河日一百五十里江一百里餘水
七十里轉運微斂送納皆準程節其遲速其三峽砥柱
之類不拘此限若遇風水淺不得行者即於隨近官司
申牒驗記聽折半功不及是則為違程董昌蓋計日限
程以至長安又不許
以雨雪風水準折也

貢奉為天下最由是朝廷以為忠

寵命相繼官至司徒同平章事爵隴西郡王昌建生祠

于越州制度悉如禹廟

禹廟在越州會稽縣東南七里

命民間禱賽者

賽先代翻先祈福於神其後報祠謂之賽

無得之禹廟皆之生祠昌求為越

王朝廷未之許昌不悅曰朝廷欲負我矣我累年貢獻

無算而惜越王邪有諂之者曰王為越王昌若為越帝

於是民間訛言時世將變競相帥填門喧譟請昌為帝

帥讀曰率

昌大喜遣人謝之曰天時未至時至我自為之其

僚佐吳瑤都虞候李暢之等皆勸成之吏民獻謠識符

瑞者不可勝紀

勝音升

其始賞之以錢數百緡既而獻者


日多稍減至五百三百而已昌曰識云兔子上金牀此
謂我也我生太歲在卯明年復在卯

復扶
翻

二月卯日卯

時吾稱帝之秋也

為董昌僭號錢錄
舉兵討之張本



資治通鑑卷二百五十九